

## МАРКТЫҢ ЧАХСЫ ХАБАРЫ

### Кірөске түзірцең Иоанн

1:1 Худай Оолғы нанар, Иисус Христостанар, Чахсы хабар піди пасталча. 2 Худай ухаанчылар пастыра чарлаан: «Синің пурун мин поэымның илчїмнї ызарбын. Ол сағаа чол тимнеп пирер. 3 Хуу чазыда үн истїлген: „Хан Худайыбысха чол тимнеңер, көнї ползын Аның чорығы"». 4 Иоанн, килїп, хуу чазыда кїзілернї чазыхтарынаң арығланар үчүн, пыросынарға үгреткен паза кїрөске түзірген. 5 Прай Иудей чирїнең паза Иерусалимде чуртапчатхан кїзілер аңдар килгеннер. Олар, постарының чазыхтарын сығарынып, Иордан суғда Иоаннаң кїрөске түскеннер. 6 Иоанн тибе хылынаң палғаан кип-азахтығ чөрчең паза тууп хурнаң хурчанчаң. Чазы мөөдінең паза сарысхаларнаң азыранчаң. 7 Кїзілернї үгредїп, ол піди чоохтаан: «Минїң соомча миннең хай-хай илбек Кїзі килче. Мин, мөкейїп, Аның өдігїнїң пағларын даа систерге турыстығ нимеспїн. 8 Мин сїрернї суғнаң кїрөстеем, Ол, тізең, сїрернї Худай Худынаң кїрөстїр».

### Иисустың кїрөске түскенї

9 Ол күннерде Иисус, Галилея чирїндегї Назарет городтаң килїп, Иордан суғда Иоаннаң кїрөске түскен. 10 Хачан Иисус суғдаң сых килгенде, азыл парған тїгїрдең голубок хус полып, Худай Худы Аныңзар түсчеткенїн көр салған. 11 Тїгїрдең үн истїле түскен: «Син Минїң хынған Оолғымзың. Синде Минїң паарсастығ көңнїм».

### Хуу чазыда хычаландырғаны

12 Аның соондох Худай Худы хоостыра Иисус хуу чазызар парған. 13 Айнаа хычаландырып, Ол хуу чазыда хырых күн полған. Аңнар аразында чуртаан. Ангеллер Ағаа полыс турғаннар. 14 Иоанн харибге чаптырған соонда, Иисус, Галилеязар килїп, Худай Хан

Чирінің Чахсы хабарына үгреткен. 15 Ол теен: «Тус чит килген паза Худай Хан Чирі чағыннап килді. Постарыңның чазыхтарын сығарынып, пыросынаңар паза Чахсы хабарға киртініңер».

### Пастағы үгренчілері

16 Иисус, Галилей көл хазынча парчатханда, Симонны паза аның харындазын, Андрейні, көр салған. Олар көлзер сөзірбе тастапчатханнар. Ікізінең палыхчылар полғаннар. 17 Иисус оларға теен: «Минің соомча парыңар. Мин сірерні кізілер тудар иде ит саларбын». 18 Олар, сах андох, сөзірбелерін артызып, Аның соонча пар сыхханнар. 19 Ёр дее парбаанда, Ол Зеведей оолғын, Иаковты, паза аның харындазын, Иоанны, көр салған. Олар, кимеде одырып, сөзірбелерін тағырапчатханнар. 20 Иисус оларны сах андох хығырып алған. Олар, Зеведей пабазын чалчыларынаң хада кимеде артыс салып, Аның соонча пар сыхханнар.

### Иисус кізілерні имнебіскені

21 Олар Капернаум городсар читкеннер. Түрчеден, суббота күнде, Иисус, синагогазар кіріп, кізілерні үгреткен. 22 Кізілер Аның үгредиине хайхааннар. Иисус оларны, үлгү үгретчілері чіли нимес, че үлгүліг кізі чіли үгреткен. 23 Ол туста синагогада чабал хутха хаптырған кізі пол парған. Ол хысхыра түскен: 24 «Ниме кирек сағаа пісте, Назареттең сыххан Иисус? Син пісті чох идерге килгезің! Мин пілчем, кемзің Син, Худай Кізізі!» 25 Че Иисус ол кізідегі чабал хутты тымылдырыбысхан паза ағаа теен: «Сым пол, сых ол кізідең!» 26 Андада ол чабал хут, ол кізіні сілігіп, улуф табыснаң аннаң сых парыбысхан. 27 Кізілер прайзы хорых парғаннар, удур-төдір сурастырғлааннар: «Нимедір пу? Хайдағ наа үгредіг пу, іди Ол чабал хуттарға даа чахығлар пирчетсе паза олар Аның чооғын исчетселер?»

### Пётрның хазинезін имнебіскені

28 Ёр ниместең не аразына прай Галилея чиринче Иисустаңар чоох тарап парған. 29 Түрче полғанда синагогадаң сыххан соонда, Иисус Иоаннаң паза Иаковнаң хада Симон паза Андрейнің туразынзар килген. 30 Симонның хазинезі төзекте тудан ағырығнаң чатчатхан. Иисусха аннаңар сах андох чоохтааннар. 31 Иисус ол ипчизер пас килген, аның холын алып, турғызыбысхан. Ол ипчі, сах андох чазыл парып, оларға хайын сыххан. 32 Иирде, күн хончатхан туста, Иисуссар прай ағырығ паза чабал хуттарға иреелетчеткен кизилерни ағыл гурғаннар. 33 Прай город ол тураның изии хыринда чыылыс парған. 34 Ол аймах ағырығларнаң ағырчатхан көп кизилерни имнебіскен. Кизилердең чабал хуттарын сығара сүрген. Чабал хуттарға Позы Христос полчатханыңаңар кизилерге чоохтабасха чახығ пирген. 35 Иртен иртөк Иисус, турып, кизі чох чирзер парып, анда пазырған. 36 Симон паза пасха үгренчилері дее Аны тілеп парғаннар. 37 Анаң, Иисусты таап алып, Ағаа чоохтааннар: «Прайзы Сині тілепче». 38 Иисус оларға теен: «Чағынғы аалларзар паза городтарзар парааңар. Анда үгредіг апарарбыс. Мин аның үчүн килгем нооза». 39 Анаң Ол, Галилеяча чөріп, синагогаларда үгреткен паза чабал хуттарны кизилердең сығара сүрген.

### Ходырлығ кизіні имнебіскені

40 Пирсінде Иисуссар ходырлығ кизі килген. Аның алныңда тізекке түзіп, Ағаа алданған: «Сынап көңнің полза, Син мині арығлап поларчыхсың». 41 Иисус, аны айап парып, холын сунып, ағаа теен. Анаң чоохтанған: «Көңнім пар, арығ пол пар». 42 Ол сөстер соонда ағырығ кизінің ходырии сах андох чіт парыбысхан. Ол кизі арығ пол парған. 43 Иисус, аныңзар хатығ көрібізіп, сах андох аны хыйа ысхан. 44 Паза ағаа теен: «Көр, пирдеезіне чоохтаба пу нимедеңер. Парып, абысха көрініп ал, Моисей чахаан чили, арығланған үчүн Худайға тайығ сал. Анзы синің чазыл парғаныңны оларға киречилир». 45 Че анзы, сых парыбызып, полған нимедеңер чоохтап чөр сыххан. Иди Иисус городсар іле кір полбиныбысхан, город

тастында, кизилер чох чирде, полған. Че кизилер прай чирлерден Андар килглееннер.

### Чадыға кир парған кизини имнебискени

2:1 Нинчеде күн ирт парғанда, Иисус пазох Капернаумзар килген. Ол килгеннеңер ибیره тылаас табырах тарап парыбысхан. 2 Сах андох туразар кизилер чыылыс сыхханнар. Изик хыринда даа орын чох полыбысхан. Иисус оларға чооғын чоохтаан. 3 Ол туста андар чадыға кир парған кизини ағыл килгеннер. Аны төрт кизи хаап килген. 4 Кизи толдыра полғаннаңар, олар Иисуссар ирт полбаннар. Аннаңар, Ол полчатхан тура хырын көп нимес сайабызып, чадыға кир парған кизини өөртін төзекте түзирибискеннер. 5 Иисус, оларның иди киртингеннерин көрип, чадыға кир парған кизее чоохтаан: «Оолғым! Чазыхтарың синиң позыдылча». 6 Мында үлгү үгретчилериниң хай-пиреези одырған. Олар пос алынча сағын салғаннар: 7 «Нимедеңер Ол иди чоохтапча? Чазыхтарны Худай ла позытча нимес пе?» 8 Иисус, оларның сағыстарын сах андох пил салып, оларға теен: «Ноға сирерниң пастарыңа андағ сағыстар кирче? 9 Ағырығ кизее хайзын чоохтирға оой? „Синиң чазыхтарың позыдылча" алай „Тур, төзегиң алып, пар"? 10 Че сирер пилер үчүн, Кизи Оолғының чир үстүнде кизилерге чазыхтарын позыдар үлгүзи пар». Анаң чадыға кирген кизее чоохтаан: 11 «Сағаа чоохтапчам: „Тур, төзегиң алып, ибизер нан". 12 Ол кизи сах андох тур килген, төзегин алып, прайзының көзине сых парыбысхан. Кизилер, аны көрип, хайхасханнар паза Худайны сабландырғаннар. «Пис мындағ ниме хачан даа көрбеебис»,— тип чоохтасхлааннар.

### Левийни хығыртханы

13 Иисус пазох көл хазынзар парған. Прай чон Аның соонча андарох килген. Иисус оларны анда үгреткен. 14 Албан чыыпчатхан орын хыринча парчатханда, Иисус Алфейниң оолғы Левийни анда одырчатханың көр салған. Иисус ағаа теен: «Миниң соомча пар».

Левий, тур киліп, Аның соонча парған. 15 Хачан Иисус Левийнің туразында азыранчатханда, Иисуснаң паза үгретчилерінең хада албан чыгчаң паза чазыхтыг көп кизилер азыранғаннар. Оларның көбізи Иисустың соонча чөрчеңнер. 16 Үлгү үгретчилері паза фарисейлер, Иисусты албан чыгчаңнарнаң паза чазыхтыг кизилернең хада азыранчатханың көр салып, Аның үгретчилеріне чоохтанғаннар: «Ноға Ол албан чыгчаңнарнаң паза чазыхтыг кизилернең хада азыранча?» 17 Аны истіп салып, Иисус оларға теен: «Хазых кизи имчи кирексибинче, ағырыг кизи кирексипче. Мин ах сағыстыг кизилерни нимес, че чазыхтыг кизилерни, пыросынзыннар тіп, хыгырарға килгем».

### Оразадаңар талазыг

18 Ол туста Иоанның үгретчилері паза фарисейлер ораза тутханнар. Анаң олар, Иисуссар киліп, сурғаннар: «Ноға Иоанның үгретчилері паза фарисейлер ораза тутчалар, че синиң үгретчилериң ораза тутпинчалар?» 19 Андада Иисус оларға нандырған: «Той полчатса, хончатхан оол хада полза, аалчылар хайди ораза тударлар? Той парчатса, оол хада полза ораза тут полбастар. 20 Че чидер күн, хачан наа хонған оол парыбысса, андада аалчылар ораза тударлар. 21 Пирдеези наа иснең намачыны иргі кип-азахха тікпинче. Иди тік салза, наа тигілген намачы иргизин талир, тизик улам улуғ пол парар. 22 Пирдеези наа арағаны иргі торсыхха урбинча. Иди урзалар, наа араға иргі торсыхты талап салар. Араға ах чөрибизер, торсых таа нимее чарабас. Наа арағаны наа тууп торсыхха урарға кирек».

### Кизи Оолгы суббота күнниң дее ээзи

23 Пирсінде Иисусха суббота күнде тамах өсчоткен хыра хыринча парарға килискен. Аның үгретчилері, парчадып, пазахтарны үсклепчеткеннер. 24 Андада фарисейлер Ағаа чоохтааннар: «Көрдек, ноға олар суббота күнде итпес нимені итчелер?» 25 Иисус оларға нандырған: «Нөос сирер хачан даа хыгырбаазар, Давид паза

аның кізілері астап парғанда ниме ол иткен? 26 Хайди ол Авиафара теен улуғ абыстың тузында, Худай туразынзар кір киліп, абыстарға ла чирге чарадылчатхан Худайға салылған халасты чеен паза хада полған кізілеріне пирген?» 27 Аннаң андар піди чоохтаан: «Суббота күн кізілерге иділген, че кізілер ол күнге нимес. 28 Аннаңар Кізі Оолғы суббота күннің дее ээзі полча».

### Хуруп парған холлығ кізіні суббота кунде имнебіскені

3:1 Иисус пазох синагогазар килген. Анда пір холы хуруп парған кізі полған. 2 Піреелері Иисусты, ағырығ кізіні суббота күнде имнезök, пыролабызарға тіп, китееннер. 3 Иисус, тізең, хуруп парған холлығ кізее теен: «Тур прайзының алныңда». 4 Анаң кізілерге теен: «Суббота күнде чахсы ниме алай чабалны идерге кирек пе? Кізі тының арачылирға ба алай чох идерге бе?» Че олар тапсабааннар. 5 Иисус оларзар тарынып көрген паза, кізілернің нимее хайбас чүректіг пол парғаннарына хомзынып, ол ағырығ кізее чоохтаан: «Холыңны көдір». Ол кізі холын көдірібіскен. Холы, пір холох чіли, хазых пол парған. 6 Анаң фарисейлер, сых киліп, иродианнарнаң хада Иисусты чох идерге сах андох чөптес сыхханнар. 7 Че Иисус Позының үгречілерінең хада көл хазынзар парыбысхан паза Иисустың соонча көп кізілер парғаннар. Олар Галилеядаң, Иудеядаң, 8 Иерусалимнең, Идумеядаң паза Иордан суғ олзаринаң полғаннар. Тир, Сидон городтар ибіре чуртапчатхан чон, Иисустың иткен нимелерінеңер истіп алып, идök Андар көп чыылысхан. 9 Андада Иисус Позының үгречілеріне, ибіре көп чыылыс парған кізілерге хыстырбас үчүн, Позына киме тимнебізерге чахаан. 10 Ол көп кізіні имнебіскен полған, аннаңар палығлығ кізілер, Аның кипазаана даа тееп аларға тіп, Иисуссар сыынғаннар. 11 Чабал хуттар даа, Аны көр салып, Аның алныңда түндере түс парып, хысхырысханнар: «Син - Худай Оолғызың». 12 Че Иисус оларға, Позы кем полчатханың, пірдеезіне чоохтабасха хатығ чахығ пир салған.

## Иисус он ікі үгренчіні таллапча

13 Анаң Ол, тағзар сығып, Позы хынған үгренчілерні хығырып алған. Олар Иисуссар читкеннер. 14 Оларның аразынаң, Позынаң хада полчаң паза кізілер үгредерге ысчаң, он ікі кізі таллап алған. 15 Оларға кізілерні ағырығлардаң имнирге паза чабал хуттарны сығара сүрерге үлгү пирген. 16 Мына ол он ікі үгренчі: Симон, Иисус ағаа Пётр тіп сола пирген; 17 Иаков, Зеведей оолғы паза Иаковтың харындазы, Иоанн. Оларға Воанергес алай ба «Күгүрт ооллары» тіп сола пирілген. 18 Андрей, Филипп, Варфоломей, Матфей, Фома, Алфей оолғы Иаков, Фаддей, Симон Кананит 19 Паза Иуда Искариот, хайзы соонаң Иисусты садыбысхан.

## Хайди айна позын сүрер?

20 Иисус паза үгренчілері туразар кіргеннер, сооларынчд чон пазох сыыспас иде чыылысханнаңар, Ағаа паза үгренчілеріне азыранчаң даа ондай чох пол парған. 21 Иисусты килгенін истіп, Аның чағыннары, «Ол пазынаң алчаахча» тіп чоохтасханнаңар, Иисусты апарыбызарға килгеннер. 22 Иерусалимнең килген үлгү үгретчілері, тізең, «Ағаа веельзевул кір парған, аннаңар чабал хуттарны Ол айна күзінең сығара сүрче», - тіп чоохтасханнар. 23 Андада Иисус, оларны хығырып, оларға кип-чоохтарнаң чоохтап сыххан: «Хайди айна айнаны сүр полар? 24 Хачан пірее ханның чирі ікі чардыхха, ыырлазып, чарыл парза, ол чир паза тур полбас; 25 Хачан пір чурттығлар удур-төдір ыырлас сыхсалар, ол тура пүдүн полбас; 26 Хачан айна позы позынаң тоғыр көдірілзе, алай ікі чарыл парза, ол тур полбас, ағаа өлім полар. 27 Пірее күстіг кізінің туразынзар кіріп, аны палғап албаанда, турадаң пір дее ниме сығар полбас. Ээзін палғап алған соонда ла, ниме-нооларын апар полар. 28 Сынны чоохтапчам сірерге: кізілернің хайдағ даа сөклестері паза чазыхтары тасталар, хайдағ даа олар аар ползалар. 29 Че кем Худай Худын сөклир, аның пырозы хачан даа тасталбас. Ол хачан даа пыролығ

полар». 30 Пу сөстөрні Иисус Позына чабал хут кір парған тіп чоохтасчатханнаңар чоохтанған.

### Иисустың ічезі паза харындастары

31 Андада Иисуссар Аның ічезі паза харындастары чиде түскеннер. Тасхар турып, Аны хығырыбызарға кізі ызыбысханнар. 32 Иисустың хыринда чон одырған. Ағаа чоохтааннар: «Тасхар Синің ічең, Синің харындастарың паза хыс туңмаларың турчалар. Сині сурчалар». 33 Иисус оларға нандырған: «Кем Минің ічем паза Минің харындастарым?» 34 Ибіре одырчатхан чонны көріп, теен: «Мына Минің ічем паза Минің харындастарым. 35 Кем Худай көңнін толдырча, ол Мағаа харындас таа, пиче дее паза іче дее».

### Таарығцыдаңар кип-чоох

4:1 Иисус, пазох көл хазында кізілерні үгрет сыххан. Аныңзар көп кізі чыылыс парған. Аннаңар Иисус, суғдағы кимеге кіріп, анда одырыбысхан. Чон, тізең, көл хазында чарда полған. 2 Оларға көп кип-чоохтар чоохтап үгреткен. Позының үгредиинде оларға чоохтаан: 3 «Истіңер: мына таарығчы таарирға сыххан. 4 Хачан ол таарып сыхханда, пірее үреннер чол хазында тоолап парғаннар. Хустар, учух киліп, оларны хахлап салғаннар. 5 Піреезі тастығ орынға түс парған, хайда хара чир асхынах полған. Чир чуға полғаннаңар, хулғу табырах өс килген. 6 Че күн сых килгенде, хулғу, чилегелері чохтаңар, салых парып, хуруп парған. 7 Піреезі, хазалчых оттар аразына түс парған. Оттар, өзіп, хулғуны чабыра пазыбысханнар, хулғу нимістенмин халған. 8 Че піреезі, маңат чирге түзіп, нимістеніп алған. Хулғу өс парған. Піреезі отыс, піреезі алтон, хайзы чүс тее ниміс пирген. 9 Анаң оларға чоохтаан: «Кемнің истерге хулағы пар, иссін!» 40 Хачан Ол чалғызан халғанда, ибіркілері он ікі үгренчізінең хада ол кип-чоохтаңар Аның сурғаннар. 11 Иисус оларға теен: «Сіерге Худай Хан Чирінің чазыттарын пілерге пирілген, че пасха чонға аны кип-чоохтарнаң



чоохтирға кирек. 12 Иди олар постарының харахтарынаң көрчелер, че ниме көр полбинчалар. Постарының хулахтарынаң исчелер, че испинчелер паза піл полбинчалар. Сынап Худайға айланған ползалар, оларның чазыхтары позыдыларчыхтар.

### Кип-чоохты чарытханы

13 Анаң оларға чоохтаан: «Нёөс сірер пу кип-чоохты піл полбадыңар? Андағда сірер пасха кип-чоохтарны хайди піліп аларзар? 14 Таарығчы Худай сөстерін таарыпча. 15 Чол хазында тоолаан үреннер таныхтапча андағларны, хайзыларында сөс таарылған, че сөсті, искен соонда, сах андох андар айна, киліп, оларның чүректерінде таараан сөсті оғырлап парыбысча. 16 Андағох ондайнаң тастығ орында тоолатхан үреннер таныхтапча андағларны, хайзылары, сөсті ис салып, сах андох өрчіліг аны алчалар. 17 Че оларның постарында чилегелері чохтаңар паза сағыстары хубулчахтаңар, пірее чобағ пол сыхса алай сөс үчүн сүрдір сыхсалар, постарының киртінізінең табырах хыйа улыбысчалар. 18 Хазалчых оттарда тоолаан үреннер ол сөсті исчеткеннерні таныхтапча, 19 Че хайзыларында пүүнгі күннің сағыссырастары, пайирға сағынғаны паза пасха даа оох-теек сағыстар сөстерні чабыра пазыбысчалар. Олар ниміс пирбинчелер. 20 Че маңат чирде тоолаан үреннер таныхтапча андағларны, хайзылары сөсті исчелер паза аны чүректеріне алчалар. Андағлар отыс хати алай алтон хати алай чүс тее хати көп ниміс ағылчалар».

### Сівечідеңер кип-чоох

21 Анаң Иисус оларға чоохтаан: «Ниме үчүн сівечіні ағылчалар? Аны ыраға істіне алай орған алтына турғызарға ба? Сівечіні көріндіре турғызарға кирек нимес пе? 22 Тастына сых парбас пір дее чазырған ниме чоғыл, ілезіне сыхпас пір дее чазыт чоғыл. 23 Кемнің истерге хулағы пар, ол иссін!» 24 Анаң оларға чоохтаан: «Ниме искезер, аны сағынып ал турыңар: хайдағ синнең сірер пасхаларын

паалирзар, андағох ондайнаң сирерні паалирлар. Че сирерні, исчеткеннерні, артых таа полар. 25 Кемнің ниме пар, ағаа хоза пирілер. Че кемнің ниме чоғыл, аның асхынах таа пар нимезі алылар».

### Өсчөткен үреннецер кип-чоох

26 Иисус аннаң андар чоохтаан: «Худай Хан Чирі чирге үреннер тастапчатхан кизее төөй. 27 Ол хараазын узупча, күнөрте тур килче. Че үрен хайди, өт киліп, өсче ол аны пілбинче. 28 Чир позы ол үренні өскірче. Үрен пастап саптанча, анаң пазахтанча, соонаң пазағына тамах толча. 29 Тамах пыс парза, кизі сах андох орғах алча, ас кизері пасталча».

### Горчица тамағынацар кип-чоох

30 Анаң ол чоохтаан: «Худай Хан Чирін паза нимее төөйлирге чарир? Алай хайдағ кип-чоохнаң аны көзіт пирербіс? 31 Ол горчица тамағына төөй. Аны таарыпчатса, ол прай чир үстүндегі үреннерден кічіг. 32 Че таараан соонда өс парза, ол прай тамахтардаң улуғ пол парча. Саптары аның андағ парбахтар, оларның аразында тигірдегі хустар даа чазын поларлар». 33 Олар нинче піл полғанча, анча кип-чоохтарнаң Худай сөзіне үгреткен. 34 Кип-чоохтар чох Ол ниме чоохтабаан, че үгренчілерінең хада халза, оларға прай чарыт пирчең.

### Хазыр чилні амыратханы

35 Олох күн иирде Иисус үгренчілеріне чоохтаан: «Көлнің тигі саринзар кис парыбызаанар». 36 Андада олар, кизілерні позыдыбызып, кимедөк одырған Иисуснаң хада чүс сыхханнар. Оларнаң хада пасха даа кимелер полғаннар. 37 Мында уғаа хазыр чил полыбысхан. Салғахтар кимеге саабыл турғаннар паза суғ кимеге тол сыххан. 38 Иисус киме соонда, пазына нимеде частанып,

узупчатхан. Аны усхурыбызып, Ағаа чоохтапчалар: «Ўгретчи! Піс өлерте чөрбіс, нөөс синің киреең пісте халбинча?» 39 Ол, тур киліп, чилге тохтабызарға чахаан паза көлге чоохтаан: «Сым пол, тохтап пар!» Чил тохтап парған. Улуғ амыр улыбысхан. 40 Иисус ўгретчилеріне теен: «Ноға сірер андағ хортыхсар? Сірерде киртініс чоғыл ба?» 41 Олар, уғаа хорых парып, удур-төдір чоохтасханнар: «Кемдір Ол андағ? Чил дее паза көл дее Аның сөзін толдырчалар?»

### Иисустың чабал хутха хаптырған кізіні имнебіскені

5:1 Олар, көлнің пір саринзар кизіп, Гадарин чирінзер читкеннер. 2 Иисус кимеден сых килгенде, чабал хутха хаптыр салған кізі, сыырат хуюзынаң сых киліп, Аны удурлаан. 3 Ол кізі сыыраттығ хуюларда чурттығ полған паза пірдеезі аны ілчірбедең дее палғап полбачаң. 4 Аны нинче-нинче хати ілчірбедең паза кинчіден палғааннар, че ол ілчірбені үзе тартыбысчаң, кинчілерні оот салчаң. Пірдеезі аны амырат полбачаң. 5 Хараа-күнөрте ол сыыраттарда паза тағлар аразында хысхыр чөрчең паза тастарға сабынчаң. 6 Иисусты ырахтынох көр салып, Аныңзар чағын чүгүр киліп, Ағаа азахха түскен. 7 Паза улуғ табыснаң хысхыра түскен: «Ниме кирек Сағаа миннен, Иисус, Öörкі Худайның Оолғы? Худайнаң сурынчам, иреелебе мині!» 8 Иисус ағаа теен: «Чабал хут! Сых пу кізідең!» 9 Паза аннаң сурған: «Адың кем полча?» Анзы нандырып чоохтаан: «Минің адым легион, піс көптеңер». 10 Анаң ол кізінің чабал хуттары, оларны пу чирден ырах ыспасха уғаа сурынғаннар. 11 Тағ хабырғазында сосхаларның улуғ өөрі оттап чөрген. 12 Андада олар Иисустаң сурынғаннар, чоохтанып: «Пісті сосхаларзар ызыбыс, піс оларзар кір парыбызарбыс». 13 Иисус оларға сах андох аны чаратхан. Чабал хуттар, кізідең сых парып, сосхаларға кір парғаннар. Сосхалар өөрі, олар пірее ікі муна чағын полған поларлар, пөзік чардаң көлзер сегірібізіп, суғда пурлух парғаннар. 14 Сосха хадарчатханнар, тізең, чүгүрібіскеннер, анаң городта паза аалларда аннаңар чоохтап пиргеннер. Чуртағчылар ниме пол

парғаның көрерге пар сыхханнар. 15 Олар Иисуссар пас килгеннер. Пайаағы алчаахчатхан кизи, хайзында көп чабал хут полған, иптіг тонан салып, поэнының сағызында одырчатханың көрп, хорых парғаннар. 16 Көрген кизилер пуларға пайаағы алчаахчатхан кизидеңер паза сосхаларнаң ниме пол парғаныңаңар чоохтап пиргеннер. 17 Андада кизилер Иисусты постарының чирінең парыбызарға сурынғаннар. 18 Иисус кимеге одырыбысханда, пайаағы алчааххан кизи Аныңаң хада парарға сурынған. 19 Че Иисус ағаа чаратпаан паза чоохтанған: «Ибңзер парып, кизилеріңе чоохтап пир, ниме ит пирген сағаа Хан Худай паза хайди Ол сағаа ачын парған». 20 Ол кизи парыбысхан, анаң Десятиградия чирінде Иисус ниме аның иткенінеңер чоохтап сыххан. Прайзы чапсааннар.

### Иаирнін хызы тірілгені паза ағырығ ипчінің хазыхтанғаны

21 Иисус пазох көлнің пасха саринзар кизіп алғанда, Аныңзар көп кизилер чыылыс килгеннер. Ол көл хазында халған. 22 Мына Иаир тіп аттығ синагоганың пастыхтарының пірсі килген. Иисусты көр салып, ол Аның азахтарыңзар түскен. 23 Ол Иисустаң, алданып, сурынған: «Минің хызычаам өлерге чөр. Парып, холларыңны ағаа салыбыс. Ол, андада чазылып, тіріг халар». 24 Иисус аныңаң хада парған. Оларның соонча, Аны ітклек ала, көп кизилер субалысханнар. 25 Кизилернің аразында, он ікі чыл хан ахчатханыңаң ағырып, ирееленчеткен ипчі полған. 26 Ол ипчі, имчілерде полып, көп ирееленген, прай нимепарын хоратхан, че пір дее туза полбаан. Улам хомай пол парған. 27 Ол Иисустаңар истіп салғанда, кизилернең хада парған. Иисустың кистінең пас киліп, Аның кип-азаана холынаң теңен. 28 Істінде піди сағынған полған: «Мин Аның кип-азаана даа теңзем, андада хазыхтанып аларбын». 29 Сах андох аның хан ахчатханы тохтап парған. Ол ипчі ағырығдаң имненіп алғаның піл салған. 30 Олох туста Иисус, Поэнынаң хайдағда күзи сых парыбысханың сизін салып, кизилерзер айланып, сурған: «Кем Минің кип-азаама теңен?» 31 Үгречілері Ағаа

тееннер: «Син көрчезің нооза, хайди чон Сині хысча, че „Кем Мағаа теңен?" тіп сурчазың». 32 Че Иисус, Позының кип-азаана теңен кізіні таап аларға тіп, ибіре кізілерзер көрген. 33 Андада ол ипчі, поэнан нима пол парғаның сизініп, хорыхханыңа халтырап ала, Иисустың алныңда тізекке түзіп, Ағаа прай чоохтап пирген. 34 Иисус, тізең, ағаа теен: «Хызым! Синің киртінізің сині арачылап халған. Амыр-хазыхнаң пар паза пу ағырығдаң хазых пол пар». 35 Иисус іди чоохтас турчатханда, синагога устағчызының ибінең килген кізілер чоохтааннар: «Синің хызың үреп парған. Ёгретчіні хығырбасха даа чарир». 36 Че Иисус, ол сөстерні истіп, синагога устағчызына чоохтаан: «Хорыхпа, киртін не тур». 37 Анаң Пётр, Иаков паза Иаковтың харындазы Иоаннаң пасха Позының соонча пирдеезіне парарға чаратпаан. 38 Ол синагога устағчызының туразынзар килгенде, кізілернің үрүгісчечкеннерін, ылғасчатханнарын паза сыхтасчатханнарын көр салған. 39 Иисус, кір киліп, оларға теен: «Нимее үрүгісчезер паза ылғасчазар? Хызычах үребеен, ол узупча». 40 Кізілер Ағаа хатхырыс сыхханнар. Че Иисус турадаң кізілерні сығарыбысхан. Позынаң хада үгренчілерін паза хызычахтың паба-ічезін алып, хызычах чатхан орынзар парған. 41 Анаң Ол, хызычахтың холын тудып, ағаа теен: «Талифа, куми». Мынзы «Хызычах, сағаа тіпчем, тур», - теені полча. 42 Хызычах сах андох тур килген, анаң пас чөр сыххан. Ағаа он ікі час полған. Көрген кізілер уғаа хайхааннар. 43 Иисус оларға пу нимеденер пирдеезіне чоохтабасха хатығ чахаан паза хызычахты азырабызарға чоохтаан.

### [Иисусха Назаретте киртінмеешіері](#)

6:1 Иисус, ол чирлердең парып, Позының чирінзер килтен. Аныңаң хада үгренчдлері полғаннар. 2 Хачан суббота күн пол килгенде, Иисус синагогада үгредіг апарып пастаан. Аны искен көп кізілер, чапсып, чоохтасханнар: «Хайдаңдыр пу нима Анда? Хайдағ хыйға Ағаа пирілген паза хайди андағ хайхастар иділче Аның холларынаң? 3 Ол ағас узы нимес пе? Марияның оолғы, харындастары Аның

Иаков, Иосий, Иуда паза Симон? Аның пичелері пістіңөк арабысталар?» Аннаңар Аны нимее салбааннар. 4 Иисус, тізең, оларға теен: «Ухаанчыны прай чирде улуғлапчалар, че чирінде ле, туғаннары паза чуртындағылары улуғлабин саларға полчалар». 5 Аннаңар Ол мында пір дее хайхастығ нимелер ит полбаан. Көп нимес ле ағырығ кізілерні, холларын салып, имнебіскен. 6 Кізілернің киртінминчеткеннеріне хайхаан. Соонаң Ол, ибіркі аалларча чөріп, үгреткен.

### Иисус он ікөлеңні үгредіг апарарға ысча

7 Анаң Ол, он ікі үгренчші хығырып, оларны ікілердең ысхлап пастаан. Оларға чабал хутгарны сүрерге үлгү пирген. 8 Паза оларға чолға тайахтаң пасха пір дее ниме албасха чахаан: халас таа, ахча даа, сүүмек тее. 9 Олаңай ла өдік кизіп аларға паза пасха кип-азах албасха чоохтаан. 10 Анаң оларға теен: «Пірее тураа кір парзар, анда ол чирдең сыхханча улыңар. 11 Пірее туразар сірерні кирбезелер алай истерге хынмазалар, сірер, постарыңның азахтарындағы тозынны анда хахтабыс турыңар. Анзы оларның тоғыр киречіленіс полар. Сынны чоохтапчам сірерге: Содом паза Гоморра городтарға түгенні күн чарғызында пу городтаң тиме чахсы полар». 12 Үгренңілер чөр сыхханнар паза кізілерні, чазыхтарының үчүн пыросынзыннар тіп, үгреткеннер. 13 Ағырығ кізілернің чабал хуттарын сығара сүргеннер паза көп ағырығ кізілерні хайахнаң сүртклееннер паза чазылдырғаннар.

### Кірөске түзірчең Иоанның өлімі

14 Ирод хан, Иисустаңар тылаасты истіп, - Аның ады прай чирге тарап парған полған, - чоохтанған: «Ол Кірөске түзірчең Иоанн тіріл килген, ам аннаңар хайхастар ит чөрче». 15 Пасхалары тееннер: «Ол Илия полар». Че пірееелері чоохтанғаннар: «Ол ухаанчы алай пурунғы ухаанчыларның піреезі полар». 16 Ирод, тізең, истіп, теен: «Ол Иоанн полар. Мин аның мойның үзе сабызарға чахаан полғам.

Ол тіріл килді». 17 Пу Ирод алында, Иоанны тудып алып, аны харибге чаап саларға чахаан. Аны ол Филипп харындазының ипчизи Иродиаданың үчүн иткен. Ирод харындазының ипчизін алып алған полған. 18 Иоанн Иродха чоохтачаң: «Сағаа харындазыңның ипчизінең чуртирға чарабас». 19 Иродиада, тізең, Иоаннға чабалланып, аны өдірібізерге сағынчаң, че полынмачаң. 20 Ирод, Иоанның ах паза Худай чарытхан кізі полчатханың піліп, аның хорыхчан, аны хайраллачаң. Ирод, Иоанны истіп, көп ниме итчең паза чоохтарын хынып исчең. 21 Иродиадаға килістіре күн пол парған, хачан Ирод, поэның төреен күніне сылтанып, улуғ пайларға, чаачылар пастыхтарына паза Галилейдегі ах сағалларға той иткен. 22 Иродиаданың хызы, кір киліп, плесет сал пирген. Плесет салғаны Ирод ханның паза аалчыларның көңніне уғаа кірген. Хан хысха чоохтаан: «Хынған нимені кіле, прай пирем». 23 Анаң ағаа сөс пирген: «Ниме дее миннең сурзаң, аны пирербін. Чирімнің чарымын даа пирібізербін». 24 Хыс, сых нарыбызып, поэның іезінең сурған: «Ниме кілечең?» Анзы нандырған: «Кірөске түзірчең Иоанның пазын». 25 Хыс, сах андох ханзар сала маңзыри айланып, аннан сурынған: «Син мағаа сағамох Кірөске түзірчең Иоанның пазын, чаймахха салып, сыйлап пир». 26 Хан хомзын парған, че кізілер көзіне сөс пиргеннеңер, ол хысха тоғыр пол полбаан. 27 Сах андох, тиріг ал чөрчең чалчызын ызып, хан Иоанның пазын ағыл килерге чахаан. 28 Чалңызы, харибзер парып, анда Иоанның мойның кизе саабысхан. Анаң, пазын чаймахта ағыл киліп, хысха пирібіскен. Хыс, тізең, аны іезіне пирген. 29 Иоанның үгренчілері, ол тылаасты истіп салып, пеер килгеннер. Аның сөөгін алып алып, хомдаа сал салғаннар.

### Пис муң кізінің тосханы

30 Үгренчілер, айланып, Исуссар чыылыс килгеннер. Олар ниме иткеннерінеңер паза нимее үгреткеннерінеңер прай Ағаа чоохтап пиргеннер. 31 Исус оларға теен: «Кізі чох чирзер ағылахти парып,

үр нимес тынанып алаанар». Олар полған орында килчеткен паза парчатхан кизілер көп полған, аннаңар оларға азыранарға даа маң чох полған. 32 Олар, кимеге постары ла одырып, кизі чох орынзар чүс парыбысханнар. 33 Чон оларның іди чүс париғаннарын көрген, көбізі оларны танып салған. Прай городтардаң кизілер, «үгүрікнең парып, андар пулардаң пурун чидіп, анда чыылысханнар. 34 Иисус, кимедең сых киліп, көп чонны көр салғанда, оларға айап парған. Олар хадағчы чох хойларға төөй полғаннар. Иисус оларны көп нимее үгрет сыххан. 35 Иледе тус ирт парғанда, Иисустың үгренчилері, Аныңзар пас киліп, чоохтааннар: «Мында ээн чазы чир, че орай пол парир. 36 Позыдыбыс кизілерні. Оларның чичең нимелер' чоғыл. Хости аалларзар парып, постарына халас таа алып алзыннар». 37 Иисус оларға нандырған: «Сіерер оларға чичең ниме пиріңер». Үгренңилер сурғаннар: «Арса піске, парып, ікі чүсче динарийге халас садып алып, оларға үлебізерге кирек?» 38 Че Иисус олардаң сурған: «Сіереннің нинче халас пар? Парып, көр киліңер». Олар, көр киліп, чоохтааннар: «Пис халас паза ікі палых пар». 39 Андада Иисус үгренчилеріне кизілерні көк отта кизекти одырт саларға чахыбысхан. 40 Кизілер илігердең паза чүзердең изерістіре одырыбысханнар. 41 Иисус, ол пис халасты паза ікі палыхты алып, тигірзер көріп, алғабысхан. Анаң, халасты сындырып, үгренчилеріне пирген, олар, тізең, кизілерге үлееннер. Ікі палыхты ідөк прай чонға үлеп пирген. 42 Прайзы тосханча азыранып алғаннар. 43 Анаң артхан халас кизектерін паза палыхтың халғаннарын он ікі харачахха толдыра чыып алғаннар. 44 Прайзы пис муңа чағын ир кизі азыранған полар.

## Суғча чөргені

45 Аның соонаң Иисус, Позы чонны ибзер позытханча, үгренчилеріне, кимеге одырып, көл олзаринзар, Вифсаидазар, парарға чахаан. 46 Анаң, кизілерні позыдыбызып, Ол тағзар пазырарға парған. 47 Иирде үгренчилер кимеліг көл ортызында



полғаннар, Иисус, тізең, чалғызан тағда халған. 48 Ол, чилге удур табырах пар полбин, кимедегілернің ирееленчеткеннерін көрген. Орты хараа соонда, иртензер Иисус, оларзар суғ үстүнче пас парыш, хыринча ирте халарға иткен. 49 Үгретчилері, Аны суғ үстүнче килчеткенін көр салып, сүне полар тіп, хысхырыза түскеннер. 50 Прайзы, Аны көріп, хорых парғаннар. Иисус сах андох оларнаң чоохтас сыххан: «Пу Минмін, хорыхпаңар». 51 Анаң Иисус оларның кимелеріне одырыбысхан. Чил тохтап парған. Үгретчилері уғаа тын хайхап парғаннар. 52 Олар пис халасты анча кизее хайди таңнастығ читіргенін піл полбин халғаннар, чүректері оларның тас чили хат парғаннаңар.

### Көп кизіні имнебіскені

53 Көлни кис киліп, олар Геннисарет чирінде чарға сыхханнар. 54 Олар, кимедең сых килгеннерінде, андағы чуртағчылар Иисусты танып салғаннар. 55 Аның килгенінеңер прай чирлерде искірібіскеннер паза ағырығ кизілерні төзектерінең хада андар, хайда ол полған, ағыл турғаннар. 56 Анаң Иисус, хайдар даа парза, пірее аалзар алай городсар кір килзе, кизілер, ағырығ кизілерні ағыл киліп, ачых чирлерде чатыр салчалар. Ағырығ кизілер Иисустаң кип-азаана даа холнаң теертіп аларға сурынғаннар. Ағаа теңен кизілер чазыл парчатханнар.

### Улуғларның кибірлері

7:1 Иисуссар фарисейлер паза Иерусалимнең килген хай-пірее үлгү үгретчилері чыылыс парғаннар. 2 Олар Иисустың хай-пірее үгретчилері, халасты арығ нимес алай чуғбаан холларынаң тудып, чіпчеткеннерін көр салып, пыролааннар. 3 Кибір хоостыра фарисейлер паза пасха даа иудейлер, холларын иптеп чууп албаанда, азыранминчалар. 4 Садығдаң ниме ал килзелер, постарын кибір хоостыра чууп албаанда, чибинчелер. Пасха даа кибірлері оларның пар: айахтарын, чірчелерін, хазаннарын паза сіреелерін ідөк арығ

иде чуупчалар. 5 Соонаң фарисейлер паза үлгү үгретчилері Аның сурғаннар: «Ноға синің үгретчилерің, пурунғыларның иргі кибірін сайбап, чуғбаан холларынаң халас чіпчелер?» 6 Иисус оларға, нандырып, чоохтанған: «Сілер осхас чойырхостарданар орта чоохтаан ухаанчы Исаия: „Пу кізілер мині тілдерінең не улуғлапчалар. Чүректері, тізең, миннең оортахтар. 7 Че тикке ле олар, кізілер кибірлеріне пасхаларын үгретіп, мині улуғлапчалар". 8 Сілер, Худай чахиин тастап, кізілер кибірлерінең устанчазар. Чірчелер, аяхтар чуупчазар паза пасха даа андағ нимелер итчезер». 9 Анаң оларға леен: «Сілер іди Худай чахиин постарыңның кибірлерінің үчүн тутпинчатсар чохсы ба? 10 Моисей чоохтаан полған: „Пабанны паза ічеңні улуғла", „Паба-ічезін сөклепчеткен кізі өлімге чарғыладар". 11 Сілер, тізең, чоохтапчазар: „Кізі поэының паба-ічезіне: „Мин сілерге пирчең нимені Худайға пир салғам", - тіпче». 12 Ол ондайнаң сілер кізі паба-ічезіне паза полыспазын тіп ол кізее чаратчазар. 13 Андағ ондайнаң сілер Худай сөзін постарың турғысхан кибірге алыстырчазар. Пасха даа андағ көп нимелер итчезер». 14 Анаң, прай чонны чыып алып, Иисус оларға теен: «Истіңер Мині прайзыңар паза пілерге күстеніңер. 15 Кізее тастынаң кірчеткен пір дее ниме кізіні ардатпинча. Кізідең сыхчатхан ниме кізіні ардатча. 16 Кемнің истерге хулаа пар, ол иссин!» 17 Ол, кізілердең чарылып, туразар кір килгенде, Аның үгретчилері пайаағы кип-чоохтаңар сурғаннар. 18 Иисус оларға теен: «Нөös сілер дее піл полбадыңар? Нөös сілер оңарбинчазар, ноға кізее тастынаң кірген ниме аны ардатпинча? 19 Кізілер тастынаң кірген ниме чүреензер парбин, аның хурсағынзар парча. Анаң, кирек чох ниме полып, сых парыбысча. Ол ондайнаң полған на чиис арығ полча». 20 Аннаң андар Иисус чоохтаан: «Кізідең сыхчатхан ниме кізіні ардатча. 21 Кізі істінең, кізі чүреенең сыхчатхан хомай сағыстар, суғдыр хылых, өдірістер, 22 Оғырлас, кізі алаахтырғаны, өкпеленіс, чабалыныс, атаанас, Худайны нимее салбааны, көдірілчик полғаны, алаахханы сыхча. 23 Прай пу хомай нимелер, кізі істінең сығып, кізіні ардатчалар».

## Иисустың ипчее полысханы

24 Пу чирлердең сығып, Иисус Тир паза Сидон чирлерінзер читкен. Ол, тураа кіріп, Позын таныттырбасха сағынған, че Аны танып салғаннар. 25 Хызы чабал хутха хаптыр салған пір ипчі, Аннаңар ис салып, Иисуссар киліп, Аның азаанзар түзібіскен. 26 Че ол ипчі, еврей нимес, сиропфиникиянкар төлінең полған. Амды, хызынаң ол чабал хутты сығара сүрібізерге тіп, Иисусха алданған. 27 Че Иисус ағаа теен: «Пастап олғаннарны тосхыр саларға кирек. Халасты, олғаннарға пирбин, адайларға тастабысса, чахсы полбас». 28 Ипчі ағаа нандырған: «Иди, Хан Худайым! Че адайлар даа стол алтында олғаннарның халас унахтарын чіпчелер». 29 Андада Иисус ағаа теен: «Андағ чахсы нандырығ үчүн ибінзер пар. Чабал хут синің хызыңнаң сых парыбысхан». 30 Ибінзер киліп, ол ипчі көрзе, хызы төзекте чатча, чабал хут аннаң сых парыбыстыр.

## Туных паза тіл чох кізіні имнебіскені

31 Тир паза Сидон чирлерінең сығып, Иисус Десятиградия чирлерін тобыра пазох Галилей көлзер пар сыххан. 32 Пірсінде Иисуссар туных паза чоохтан полбинчатхан кізіні ағыл килгеннер. Иисусты холларын ағаа салыбызарға сурынғаннар. 33 Иисус ол кізіні чоннаң оортах апарып алған. Анаң, хол салааларын аның хулахтарына суғыбызып, түкүрібіскен паза аның тіліне теерткен. 34 Анан, тигірзер көрібізіп, улуғ тыныбызып, чоохтанған: «Еффафа!» /«Ачыл пар!»/ 35 Сах андох ол кізінің хулахтары ис сыхханнар, тілі, маңат айланып, арығ чоохтан сыххан. 36 Анаң Иисус оларға пу нимеденер пірдеезіне чоохта-басха чоохтаан. Че нинче дее чаратпинчатса, кізілер улам чоох таратханнар. 37 Кізілер, уғаа таңназып, чоохтасханнар: «Ол прай нимені чахсы итче: туных кізілерні имнебісче паза тілі чохтарны чоохтандыртча».

## Төрт муң кізінің тосханы

8:1 Ол күннерде Иисуссар пазох көп кизи чыылыс парган. Оларның чичең нимелери чох полган. Иисус, Позының үгреничлерин хыгырып алып, оларга чоохтаан: 2 «Магаа пу чон аястыг. Миннең хада үс күн пол парирлар, аннаңар амды чиистери халбады. 3 Оларны иблеринзер азырабин нандырыбыссам, чолда майых парарлар. Пиреелери пеер угаа ырахтаң килгеннер». 4 Аның үгреничлери Агаа нандырганнар: «Пу хуу чазыда мынча чонны азырачаң халасты хайдаң таап алар?» 5 Иисус олардаң сурган: «Сирерниң нинче халас пар?» Олар нандырганнар: «Чити». 6 Андада Ол кизилерге чирге одырыбызарга чахыбысхан. Анаң Ол, чити халасты алып, Худайны алгыстап, халастарны сындырган паза үгреничлерине пирген. Олар кизилерге үлеп пиргеннер. 7 Оларның нинчеде палыгас пар полган. Алгабызып, Ол палыхты идок үлебизерге чахаан. 8 Прайзы, азыранып, тос парганнар. Чиистиң артханы чити корзинаа тол парган. 9 Азыранган кизилерниң саны төрт муңча полган полар. Анаң оларны Иисус нандырыбысхан. 10 Анаң, үгреничлеринең хада кимеге одырыбызып, Иисус Далмануфа чирлеринзер читкен.

### Фарисейлер таныг тилепчелер

11 Идок пеер фарисейлер читкеннер паза Иисуснаң талас сыхханнар. Олар, Иисусты хыңаландырып, Аның, тигирдең пире таныг ит пирзин тип, сурынганнар. 12 Иисус, улуг тыныбызып, чоохтан салган: «Нога пу төл таныг хысча? Сынны чоохтапчам, сирерге пир дее таныг полбас». 13 Анаң, олардаң хыйа парып, пазох кимеге одырыбысхан. Көлнің пир саринзар кис парыбысхан. 14 Аныңаң хада парчатхан үгреничлер халас аларга ундуп салтырлар. Кимеде оларның пир ле халас полтыр. 15 Иисус үгрет парган: «Сибер чөриңер. Фарисейлернин паза Иродтың ачитхыларынаң китениңер». 16 Угреничлер удур-төдир чоохтас сыхханнар: «Пистиң халас чохтаңар ол иди тиче полар». 17 Нимеденер олар чоохтасчатханың пилип, Иисус үгреничлерине теен: «Нога сирер халас чоғыл тип чоохтас-чазар? Нөөс сирер ам даа көрбинчезер паза пил полбин-

чазар? Нёос чүректерің сірернің іди хат парған? 18 Харахтарың парда, хайди көрбинчезер? Хулахтарың парда хайди испинчезер? Нёос ундуп салғазар? 19 Хайди мин пис халасты пис муң кізее үлебіскем? Сірер халастың артхан-халғаның нинче харачах чыып алғазар?» Ағаа нандырғаннар: «Он ікі». 20 «Че хачан читі халасты төрт муң кізее пиргенде, нинче корзинаа чіңең-нине арт халған?» Чоохтааннар: «Читі». 21 Андада ол теен: «Нёос сірер амға теере нине піл полбинчазар?»

### Харах чохты имнебіскені

22 Олар Вифсаидазар читкеннер. Иисуссар харах чох кізіні чидін килгеннер. Ағаа холын теертібіссін тіп, Иисустаң сурынғаннар. 23 Ол, харах чох кізіні холынаң тудып, аал тастынзар апарған. Анаң, аның харахтарына түкүріп, ағаа холын салыбысхан, анаң сурған: «Пирее нине көрчезің ме?» 24 Ол кізі, көрібізіп, теен: «Мин иртчеткен кізілерні көрчем. Олар ағастарға төйлер». 25 Иисус пазох аның харахтарына холларын салыбысхан. Анаң пазох көрерге чахаан. Амды ол кізі, чазыл парып, прай нимені чахсы көр сыххан. 26 Иисус аны ибінзер ысчатханда, чоохтап пирген: «Аалзар кірбин, наныбыс паза пирдеезіне нине чоохтаба». 27 Иисус Позының үгренчілерінең хада Кесария Филиппова чирнің аалларынзар аннаң андар пар сыххан. Чолда парчадып, Ол Позының үгренчілерінең сурған: «Кізілер Мині кем тіп санапчалар?» 28 Олар нандырғаннар: «Пиреелері, Сині Кірөске түзірчең Иоанн полча тіп, санапчалар. Пасхалары, тізең, Илия тіп чоохтасчалар, хайзылары, ухаанчыларның пірсі полар тіп, таласчалар». 29 Иисус оларға теен: «Сірер чи Мині кемге санапчазар?» Пётр Ағаа нандырған: «Син - Христоссың». 30 Андада Ол үгренчілеріне Позыныңар пір дее кізее чоохтабасха чахаан.

Иисус Позының ирееленерінеңер, өлімінеңер паза тірілерінеңер ухаанчылапча

31 Анаң оларны үгрет сыххан. Кізі Оолғы көп чобағ көрер, ах сағаллар, улуғ абыстар паза үлгү үгретчілері Аның тоғыр поларлар. Аны өдір саларлар, че үзінчі күнінде Ол тіріл килер. 32 Ол прайзына аннаңар көні чоохтап пирген. Пётр, тізең, Аны хыйа апарып, тоғыр чоохтанған. 33 Че Иисус, айланып, Позының үгретчілерінзер көрібіскен. Анаң Пётрға хатығ чоохтанған: «Хыйа пар Миннең, айна! Син Худайдаң сағынминчазың, че кізілер чили сағынчазың». 34 Анаң кізілерні паза Позының үгретчілерін хығырып алып, оларға чоохтаан: «Кем Минің соомча парарға хынча, ол Позынаңар сағынмасха кирек. Позының кірезін алып, Минің соомча парзын. 35 Кем позының тының арачылап халарға сағынча, ол аны чідір салар, че кем позының тының Минің паза Чахсы хабар үчүн пирибізер, ол тының хайраллап халар. 36 Прай даа тилекейні холға кирип алып, че позының тының чідір салза, ол кізее хайдағ туза полар? 37 Алай нименең соонаң тоолап алар ол позының тының? 38 Пу ай-пораан паза чазыхтығ төл аразында піреезі Миннең алай Минің сөстерімнең уйатса, андада Кізі Оолғы, хачан Ол Позының Адазының сабланызынаң паза Худай ангеллерінең хада килзе, ідөк аның уйадар.

## Иисустың хубулғаны

9:1 Иисус оларға теен: «Сынны чоохтапчам сірерге. Мында турчатханнарның хай-піреезі позының чуртазындох Худай Хан Чирін прай күзінде килгенін көріп алар». 2 Аның соонаң алты күн ирт парғанда, Иисус, Пётрны, Иаковты паза Иоанны ла Позынаң хада алып, пөзік тағзар апарған. Анда Ол оларның алныңда хубул чөрібіскен. 3 Аның кип-азағы ах хар осхас чылтырах пол парыбысхан. Андағ ах полған, хайзын пір дее кізі, пу чир үстүнде чууп, іди ағарт полбасчых. 4 Оларға Илиянаң Моисей көріне тўскеннер. Олар Иисуснаң чоохтас сыхханнар. 5 Андада Пётр Иисуссар айланған: «Үгретчі! Хайдағ чахсы піске мында поларға. Үс отах турғыс пирербіс. Пірсі - Сағаа, ікінчізі - Моисейге паза үзінчізі -

Илияға». 6 Олар уғаа хорых парғаннаңар, Пётр іди, ниме тирін пілбин, чоохтанған. 7 Пулут сых килген паза көлеткізінең оларны чабысхан. Пулутсартын үн истіле түскен: «Пу Минің хынчатхан Оолғым. Истіңер Аны!» 8 Анаң үгренңілер ибіре кинетін көрібіскенде, хыриларында Иисустаң пасха пір дее кізі чох полған. 9 Олар тағдаң түсчеткеннерінде, Иисус оларға көрген нимедеңер, Кізі Оолғы үреен соонда тірілбеенче, пірдеезіне чоохтабасха чоохтаан. 10 Олар пу нимені пірдеезіне чоохтабааннар, че удур-төдір сурастырысхлааннар: «Нимедір анзы, өлім соонда тіріл килері?» 11 Анаң үгренңілері Иисустаң сурғаннар: «Ноға үлгү үгретчілері чоохтачаңнар, пурун Илия килерге кирек полған?» 12 Иисус оларға нандырған: «Анзы орта. Пурун Илия, киліп, прай ниме тимнеп саларға кирек полған паза хайди пазылған, Кізі Оолғына көп ирееленерге паза хыйыхтатырарға үлүс түсче. 13 Че сірерге чоохтапчам, Илия килген полған, че аны, хайди аннаңар пазылча, хайди хынғаннар, іди иткеннер».

### Оолағасты имнебіскені

14 Олар үгренчілерінзер килгенде, оларның ибіре кізілер чыылыс парғаның паза үлгү үгретчілері оларнаң таласчатханнарын көр салғаннар. 15 Олох туста, Иисусты көр салып, кізілер таңнап парғаннар паза, Аны удурлап, чағын чүгүріс килгеннер. 16 Иисус үлгү үгретчілерінең сурған: «Сірер оларнаң нимедеңер таласчазар?» 17 Чон аразынаң пір кізі Ағаа нандырған: «Үгретчі! Мин Синзер тіл чох итчеткен чабал хутха хаптырған оолғымны ағылдым. 18 Чабал хут, аны хайда ла полза, чирге тастапча. Аның ахсынаң көбік ахча, тістерін хыңырадып, тыып парча. Мин Синің үгренңілерінзер айланғам, ол чабал хутты сығара сүрзіннер тіп, че олар сүр полбааннар». 19 Ағаа нандырып, Иисус теен: «О, киртізі чох төл! Нинчезін Мин сірернең хада поларбын? Хачанға теере Мин сірернең сыдазарбын? Ағылыңар аны Минзер». 20 Оолағасты Иисуссар ағыл килгеннер. Чабал хут Иисусты көргендөк, оолағасты чирге тастап,

талдыр сыххан. Оолгычах, чирге аңдарыл парып, тітіреп сыххан, аның ахсынаң көбік ахчатхан. 21 Иисус аның пабазынаң сурған: «Иди үр ағыр парир ба?» Анзы нандырған: «Кічигдең сығара. 22 Көп хати чабал хут, аны чох идерге тіп, отха паза суға тастаан. Пірее ниме ит полар ползаң, піске айап, полыс пир». 23 Иисус ағаа нандырған: «Ноға іди тіпчезің „пірее ниме ит полар ползаң". Киртінчеткен кізее прай ниме полар». 24 Сах андох оолағастың пабазы, харах чазын төгіп, хысхырған: «Киртінчем. Минің киртінізім читпинчеткеніне полыс пир». 25 Иисус, ибіре чон чыылысчатханың көріп, чабал хутха чоохтанған: «Тілі чох паза туных итчеткен чабал хут! Мин сағаа чахыпчам: сых пу оолағастаң паза кірбе аңдар!» 26 Чабал хут хысхыра түскен, оолағасты тың тітіредібізіп, аннаң сых парыбысхан. Оолағас өліг ле чіли чатхан. Кізілернің көбізі, «ол өл парды» тіп, чоохтас сыхханнар. 27 Че Иисус аны, холынаң алып, көдірібіскен. Оолах сах андох тур килген. 28 Иисус, тураа кір килгенде, үгренңілері Аның ағылахха сурғаннар: «Ноға піс ол чабал хутты сығара сүр полбаабыс?» 29 Иисус оларға нандырған: «Андағларны пазырып ла паза ораза ла тудып сығара сүрерге кирек».

### [Иисус Позынаңар пазох ухаанцылапча](#)

30 Аннаң сығып, олар Галилеяча парғаннар. Че Иисус, олардаңар пірдеезі пілбезін тіп, сағынған. 31 Ол, Позының үгренңілерін үгредіп, оларға Кізі Оолғын кізі холларына пиріл парарынаңар, анаң Аны өдір саларларынаңар паза үзінчі күнінде тіріл килеріненер чоохтаан полған. 32 Үгренңілері ол сөстерні піл полбааннар, че Аның суарға тідінмееннер.

### [Кем улуғдыңар талазығ](#)

33 Олар Капернаумзар килгеннер. Анаң, хаңан олар турада полғаннарында, Иисус үгренңілерінең сурған: «Чолда нимеденер іди пос алынңа чоохтас килгезер?» 34 Үгренңілері тапсабааннар. Олар, чолда килчедіп, кем оларның аразында улуғ полчатханынаңар



таласханнар. 35 Анаң одырыбызып, Иисус, он ікі үгренчізін хығырып, оларға чоохтаан: «Кем сірернің иң пастағызы поларға сағынча, ол прайзының халғанчызы паза прайзына чалчы поларға кирек». 36 Анаң, паланы алып, оларның алныңда турғызып, аны хунахтап, үгренчілеріне чоохтаан: 37 «Кем Минің үчүн мындағ кічіг палаларның піреезін маңат удурлапча, ол Мині маңат удурлапча. Паза кем Мині удурлапча, ол Мині нимес, че Мині ысхан Худайны маңат удурлапча».

### Кем сірернің тоғыр нимес, ол сірернең хада

38 Андада Иоанн теен: «Үгретчі! Піс Синің адыңнаң чабал хуттарны сығара сүрчеткен кізіні көргебіс. Ол пістің арабыстаң полбааннаңар, піс аны тохтатхабыс». 39 Иисус нандырған: «Тохтатпаңар аны. Кем Минің адымнаң хайхастар итче, ол соонаң Мині сөклеп полбас. 40 Кем сірердең тоғыр нимес, ол сірернең хада полча. 41 Кем Минің үчүн сірерге, Христостың үгренчілеріне тіп, пірее чірче суғ пирер, ол кізі, сынны чоохтапчам, поэна сыйых чох халбас.

### Хыцаланыстаңар

42 Че кем Мағаа киртінчеткеннернің кічіглернің дее піреезінің киртінізін сайғапча, аны мойныңа теербен тазын палғап, суғзар тастабысса, артых поларчых. 43 Сынап синің холың чазыхха суччатса үзе сабыс аны. Тоозылбас чуртасха кинек полып кірзе чохсы полар, ікі холлығ геенна өртінзер, успас отсар парғанңа. 44 Ол чирде оларның хурттары өлбинчелер паза успас от көйче. 45 Сынап сині азааң чазыхха суччатса, үзе сабыс аны. Тоозылбас чуртасха пір азахтығ кірзе чохсы полар, ікі азахтығ геенна өртінзер, успас отсар парғанңа. 46 Ол чирде оларның хурттары өлбинчелер паза успас от көйче. 47 Сынап сині харааң чазыхха суччатса, сығара тартыбыс аны. Худай Хан Чирінзер пір харахтығ кірзе чохсы полар, геенна өртінзер ікі харахтығ түскенңе. 48 Ол чирде оларның хурттары өлбинчелер паза успас от көйче. 49 Анда полғаны ла отнаң

арығлалча, хайди тайыға салған ит туснаң тусталча. 50 Тус — маңат ниме. Че тустың тадии чох пол парза, аны хайди хатап ачығ идиң аларзар? Төөле тустығ полыңар паза удур-төдір ынағ чуртаңар».

### Хоньхтанар паза чарылыстанар үгредіг

10:1 Иисус андартын сығара Иордан суғның пір саринзар Иудей чирінзер килібіскен. Пазох Иисуссар кизілер чыылысханнар. Ол оларны пазох Позы көніккен хоостыра үгреткен. 2 Фарисейлер пас киліп, Аны хычаландырып, сурғаннар: «Чарадылча ба ирепчи кизее чарылызарға?» 3 Иисус оларға теен: «Ниме сірерге чахаан Моисей?» 4 Олар нандырғаннар: «Моисей ир кизее, ипчизіне чарылызарынаңар пічік пас пирзе, чарылызарға чаратхан». 5 Иисус оларға чоохтаан: «Ол, сірернің хатығ чүректеріңні көріп, ол чахығдағы пічікті пасхан. 6 Чир-чайаан пүдірчеткенде, Худай иренні паза ипчизіні чайап салған. 7 Аннаңар ир кизі, пабазын паза ічезін халғызып, ипчизіне хозылча. 8 Андада олар, ікі кизі нимес, че пір кизі осхас пол парчалар. 9 Аннаңар Худай піріктір салғаны кизі чарбасха кирек». 10 Соонаң турада үгренчилері Иисустаң аннаңар хатабох сурғаннар. 11 Иисус оларға нандырған: «Кем, ипчизінең чарылып, пасха ипчизіні ал салза, ол ипчизінең тоғыр чазых итче. 12 Че хачан ипчизі, иринең чарылып, пасха ирге пар салча, ол иринең тоғыр чазых итче».

### Иисус олғаннарны алғапча

13 Иисуссар кизілер палаларын, Ол оларны алғабыссын тіп, ағылғаннар. Че үгренчилері оларны Ағаа чағын итпин турғаннар. 14 Аны көр салып, Иисус, тарын парып, оларға чоохтанған: «Килзіннер палалар Минзер. Тохтатпаңар оларны. Худай Хан Чирі оларға пирілче. 15 Сынны чоохтапчам сірерге, кем, олған чили, Худай Хан Чирін удурлабас, ол андар хачан даа кір полбас». 16 Анаң, олғаннарны хучахтап, оларны, пастарына холларын салып, алғаан.

### Пай полары хорғыстығ

17 Хачан Иисус чорыхха сығарға тимненчеткенде, хай-дағ-да кизи, чүгүр килип, Аның алнында тизекке түзибискен: «Паарсах Ыгретчи! Ызилбес чуртас алар үчүн, мин ниме идерге кирекпин?» 18 Иисус агаа теен: «Ноға син Мини паарсах тичезиң? Чалғыс Худайдаң пасха пирдеези паарсах нимес. 19 Пилчезиң ме чакығларны: кизи одирбе, суғдыр полба, оғырлаба, чой ниме киречилебе, кизини хыйыхтаба, паба-ичеңни улуғла». 20 Ол кизи нандырған: «Ыгретчи! Мин ол чакығлар хоостыра чииттең сығара чуртапчам». 21 Иисус паарсах корибискен ол кизизер, анаң теен: «Сагаа ам даа пир ниме читпинче. Парып, прай пар нимеңни садыбыс. Ахчаларны чох кизилерге пирглебис, андада син тигирде испайлығ поларзың. Анаң Минзер килип, кирезиңни алып алып, Миниң соомча парарзың». 22 Пу состерни истип, ол кизиниң сырайы алыс парған. Хомзын парып, хыйа пазыбысхан. Ол угаа пай кизи полған. 23 Иисус, ибире корибизип, Позының угренчилерине чоохтаан: «Хайдағ сидиктир пай кизилерге Худай Хан Чиринзер кирерге». 24 Угренчилери ол состерге хахап парғаннар. Че Иисус пазох оларға чоохтаан: «Палаларым, пайына изенчеткеннерге хайдағ сидиктир Худай Хан Чиринзер кирерге! 25 Пай кизи Худай Хан Чиринзер киргенче, тибе малға иче уттеринче ирт парыбызарға оой полар». 26 Угренчилер, тизең, улам хахап парып, удур-тодир чоохтасханнар: «Андагда кем арачылан халар?» 27 Иисус, оларзар корип, чоохтанған: «Кизилерниң пирдеези арачылан полбас, Худай ла арачылир. Полған на ниме Худайдаң полар». 28 Петр агаа чоохтанған: «Мына, пис прай нимебис таста синиң соонча парғабыс». 29 Иисус нандырған: «Сынны чоохтапчам сирерге, Миниң паза Чахсы хабар үчүн поэнының туразын алай харындас-пичелерин, алай пабазын, алай ичезин, алай ипчизин, алай палаларын, алай чирин халғысхан кизилер, 30 Амғы туста, сурдирчеткенде, чус хати коп тураларға, харындас-пичелерге, пабаларға, ичелерге, палаларға, чирге чидерлер, че идок килчеткен туста тоозылбас чуртас аларлар. 31 Сагам пастағызы полчатханнарның кобизи халғанчызы, халғанчылары, тизең, пастағылар пол парарлар».

## Иисус өлімінеңер пазох ухаанчылапча

32 Олар Иерусалимзер чорых тутчатханда, Иисус алнында парчатхан. Үгренчілері Аның соонча таңнап паза пасха кізілер хорығып ала парғаннар. Анаң Иисус, он ікі үгренчізін хығырып алып, Позынаң ниме пол парарынаңар пазох чоохтап сыххан: 33 «Мына піс Иерусалимзер парчабыс. Анда Кізі Оолғын улуғ абыстарға паза үлгү үгретчілеріне садыбызарлар. Олар Аны өлімге чарғылабызарлар паза Аны худайы чохның холына пирібізерлер. 34 Олар Аны иреелирлер, соғарлар, чаба түкүрерлер, анаң өдір саларлар. Че үзінңі күнінде Ол тіріл килер».

## Зеведей оолларының сурынызы

35 Андада Иисуссар Зеведейнің ооллары, Иаков паза Иоанн, пас киліп, тееннер: «Үгретчі! Піс Сині пір ниме толдыр пирерге сурынчабыс». 36 Иисус олардаң сурған: «Ниме Мин сірерге ит пирерге кирекпін?» 37 Олар Ағаа нандырғаннар: «Синің үлгүң читсе, пірсібіске Синің оң саринда паза пірсібіске сол саринда одыр саларға чарат». 38 Че Иисус оларға чоохтанған: «Ниме сурчатханнарыңны даа пілбинчезер. Мин ісчөткен чірчедең іс поларзар ба, Мин кірөске түскен чіли кірөске түзерзер бе?» 39 Олар нандырғаннар: «Пол поларбыс». Андада Иисус оларға теен: «Сірер Мин ісчөткен чірчедең ізерзер паза сірер Мин кірөске түскен чіли кірөске түзерзер. 40 Че кем Минің оң саринда паза сол саринда одырары Миннен нимес. Анда, кемге тимнелген, олар одырарлар». 41 Пасха он үгренчізі, пу чоохты истіп, Иаковха паза Иоаннға тарыныбысханнар. 42 Андада Иисус, оларны хығырып алып, чоохтанған: «Сірер пілчезер, хайди чонда кнестерге саналчатханнар аның пиглері полчалар, оларның улуғ пайлары ол чонны үлгүлерінде тутчалар. 43 Че сірернің араларында іди полбазын. Кем сірернің араңарда ин улии поларға сағынча, ол прайзына чалчы поларға кирек. 44 Паза кем сірернің араңарда пастағызы поларға сағынча, ол прайзына хул

поларға кирек. 45 Кізі Оолғы ідөк Позына нымысчы ползыннар тіп килбеен. Ол, Позы пасхаларына нымысчы полып, кізілернің үчүн Позының тының тоолирға килген».

### Харах чох Вартимейнің көр сыхханы

46 Анаң олар Иерихонзар килгеннер. Хачан Иисус Позының үгрөнңілерінең паза көп кізілернең хада Иерихоннаң сыхчатханда, чол хазында Тимейнің оолғы, харах чох Вартимей, кіленіп, одырған. 47 Назареттең сыххан Иисустың парчатханың истіп салып, ол хысхырған: «Давид төлі, Иисус, мині айадах!» 48 Көп кізі аны, сым ползын тіп, тысхан, че ол улам тың хысхырған: «Давид төлі! Мині айадах!» 49 Иисус, тохти түзіп, аны хығыр килерге чахаан. Ол харах чох кізіні хығырып, чоохтааннар ағаа: «Чалтанма! Тур! Ол сині хығырча». 50 Ол тастындағы кип-азаан суурыбысхан, тур киліп, Иисуссар пас килген. 51 Иисус аның сурған: «Ниме кирек сағаа Миннең?». Харах чох кізі Ағаа нандырған: «Үгретчі! Мині көрер иде имнебіс». 52 Иисус ағаа теен: «Пар, синің киртінгенің сині имнеді». Сах андох ол кізі көр сыххан, анаң чолчд Иисустың соонңа парған.

### Иисустың Иерусалимзер улуғласнаң кіргені

11:1 Иерусалимге чидіп одырғанда, Елеон тағның хыриндағы Виффагия паза Вифания аалларзар чағдап килгенде, Иисус Позының үгрөнңілерінің ікізін алныңзар ызыбысхан. 2 Оларға чоохтаан: «Пістің алныбыстағы аалзар парыңар. Андар читсер, кізі мүнмеен чиит осёлны палғап салғаның таап аларзар. Аны, систіп алып, пеер чидін киліңер. 3 „Сіерер ниме итчезер?" - тіп піреезі сурза, сіерер нандырыңар: „Ол Хан Худайыбысха кирек, Ол аны анаң нандыра ызыбызар"». 4 Үгрөнңілері, аалзар парып, тасхар ізік алныңда палғап салған чиит оселны тапханнар. Анаң аны систіп алғаннар. 5 Оларны көрген кізілер сурғаннар: «Сіерер ниме итчезер? Ноға осёл палазын систіп алдыңар?» 6 Үгрөнңілер Иисус чоохтаан чіли нандыр пиргеннер. Кізілер оларны поэдыбысханнар. 7 Осёл

палазын, Иисуссар ағыл киліп, аның арғазына постарының кип-азахтарын салыбысханнар. Иисус осёлға мўнібіскен. 8 Көп кизілер чолда постарының кип-азахтарын часханнар паза пасхалары ағастар салааларын, кизіп, чолға салғаннар. 9 Аның алныңна паза соонча парчатхан чон хысхырған: «Осанна! Өөркі Чайаан адынаң килчеткен кизи аарлалзын! 10 Пістің Давид пабабыстың Хан Худай адынаң килчеткен Үлгүзи аарлалзын! Осанна тигірдегілерге!» 11 Иерусалимзер кір киліп, Иисус худай өргезінзер кірген. Прай ибіре көрглеп алған, че орай полчатханда, он ікі үгрениңизінең хада Вифаниязар парыбысхан.

### Смоковница ағазын харғааны

12 Пір күнінде Иисус үгрениңизінең хада, Вифаниядаң сығып, чолча парчатханда, астап парған. 13 Халын пүрліг смоковница ағазын Ол ырахтынох көр салған. Пірее чистек таап аларға тіп, Ол андар чағын парған, че чистектер пысхалахтаңар, пүрлердең пасха пір дее ниме таппаан. 14 Андада Ол смоковница ағазын харғабысхан: «Пірдеези паза хачан даа синиң чистегің чибезін». Аның үгрениңизі олар сөстерни икеннер. 15 Иерусалимзер килгенде, Иисус, худай өргезінзер кір киліп, анда садығ итчеткен паза нименоо алчатхан кизілерни сығара сүр сыххан паза ахча орнасчатханнарның столларын, голубоктар сатчатханнарның сиреелерин тўндерибіскен. 16 Худай өргезинче постарының ниме-нооларынаң ирт чөрчеткен кизілерге тоғыр полған. 17 Анаң оларны үгрет сыххан: «Пиди пазылған нимес пе: „Миниң турама прай чоннарға пазырчаң тура тіп адалар?“ Сирер, тізең, аны сайбағчыларның туразына айландыр салғазар». 18 Аны истіп, үлгү үгретчиңизі паза улуг абыстар Аны өдирчең ондай тілеп сыхханнар, че прай чон, Аның үгрединиң чапсыпчатханнаңар, олар Иисустаң хорыхханнар. 19 Орай улыбысханда, Иисус городтаң сых парыбысхан.

### Хуруп парған смоковница

20 Иртен олох чолча парчатханда, олар пайаағы смоковниңа ағастың прай хуруп парғаның көр салғаннар. 21 Аны сағын киліп, Пётр Иисусха теен: «Ўгретчи! Көрдек Син харғаан смоковница прай хуруп партыр». 22 Иисус оларға нандырған: «Худайға киртініс ал чөріңер. 23 Сынны чоохтапчам сірерге, кем тігі таға „көдіріл киліп, суға түс пар" тізе, олох туста чооғы хоостыра поларына пір дее ікінчілебин, прай чүреенең киртініп, чоохтаза, ол ниме толдырыл парар. 24 Аннаңар чоохтапчам сірерге, Худайға пазырып, сірер ниме дее сурзар, киртініңер, ол ниме толдырылар. 25 Худайға пазырчатсар, піреезіне тарынған ползаңар, аның пырозын тастаңар. Андада Тигірдегі Адаңар сірернің чазыхтарыңны ідөк тастир. 26 Оларның пырозын тастабазар, сірернің Титірдегі Адаңар сірернің чазыхтарыңны ідөк тастабас».

### Хайдандыр Иисустың үлгүзі?

27 Олар пазох Иерусалимзер килгеннер. Иисус худай өргезінде пас чөрчеткенде, Аныңар улуғ абыстар, үлгү үгретчилері паза ах сағаллар пас килгеннер. 28 Анаң Ағаа чоохтааннар: «Кемнің үлгүзінең Син прай пу нимелерні итчезің? Иди идер үлгүні Сағаа кем пирген?» 29 Иисус оларға нандырған: «Мин дее сірердең аннаңарох суарбын. Сірер нандыр пирзер, пу нимелерні хайдағ үлгүнең итчеткенімні чоохтабох пирербін. 30 Иоанның кірөске түзіргені кізілердең ме алай Худайдаң ма? Нандырыңар Мағаа». 31 Олар, тізең, удур-төдір чоохтас сыхханнар: «Худайдаң тізедіс, Ол тир: «Андағда сірер ноға ағаа киртінмеезер?» 32 «Кізілердең», - тіп нандыраңарға чоннаң хорыхханнар. Прай чон Иоанны ухаанчы тіп санаан. 33 Анаң Иисусха піди нандырғаннар: «Пілбинчебіс». Андада Иисус оларға теен: «Мин дее чоохтабаспын сірерге, пу нимелерні хайдағ үлгүнең итчеткенімні».

### Виноград өскірчецнердецер кип-чоох

12:1 Анаң Иисус оларға кип-чоохтар чоохтап сыххан: «Пір кізі

виноград одыртып салтыр. Аны ибiре сиденнебiскен, виноград суун ағысчаң оймах хас салған паза хадағ башнязын пүдiрген. Анаң, виноград өскiрчеткен кiзiлерге ол чирнi чалға пирiбiзiп, позы чөрибiскен. 2 Анаң виноград пыс парғанда, ол кiзi позының чалчызын виноград өскiрчеңнерзер позының үлүзiн ал килерге ызыбысхан. 3 Олар, тiзең, чалчызын тудып алып, соғып, пiр дее ниме пирбин, нандыра ызыбысханнар. 4 Ээзи кiзi пазох пасха чалчызын ысхан. Ол чалңызын, пазын таснаң чара саап, хыйыхтап, нандырыбысханнар. 5 Ол кiзi пасхох чалңызын ысхан. Анзын өдiр салғаннар. Аннаң даа пасха ысхан чалчыларның пiреезiн, соғып, нандырғаннар, пiреелерiн, тiзең, өдiр салғаннар. 6 Аның хынған чалғыс оолғы полтыр. Халғанчызын виноградха аны ысча: „Минiң оолғымнаң чалтанарлар, арса". 7 Че виноград өскiрчеңнер пос аразында чоохтазы-бысханнар: „Пу аның пабазының пайын холға алчаң чалғыс оолғы. Аны өдiр салзабыс, прай пайы пiстiң холға кiрер". 8 Аның оолғын, тудып алып, өдiр салғаннар. Анаң сөөгiн оортах тастабысханнар. 9 Хайди полар амды виноградник ээзи? Килiп, ол виноград өскiрчеңнернi өдiр салып, виноградниктi, тiзең, пасха кiзiлернiң холына пирiбiзер. 10 Нөös, сiрер Ызых Пiчiктерде хығырбаазар: „Пүдiрiгңiлер хыйа тастаан тас, соонаң уғаа кирек пол парған. 11 Анзы - Худайдаң, пiстiң хараабысха ол улуг чапсыс"». 12 Фарисейлер Иисусты тудып аларға сағынғаннар, че чоннаң хорыхханнар. Олар пу кип-чоох олардаңар чоох-талғаның сизiн салғаннар. Анаң, аны артыс салып, хыйа парыбысханнар.

### [Ханнин — ханға](#)

13 Че соонаң Иисуссар хай-пiрее фарисейлернi паза иродианнарны ысчалар. Олар Иисусты саба чоохтанарын китееннер. 14 Пас килiп, Иисусха чоохтааннар: «Ўгретчi! Пiс пiлчебiс, Син сын хылыхтығ кiзiзiң, пiрдеезiнiң көңнiне кiрерге сағынминчазың. Кем дее полза, Син Худай чолындағы сын киректердеңер үгретчезiң. Ханға албан төлирге кирек пе алай чох па пiске?» 15 Че Иисус, оларның



көйтүктөн четкеннерин сизинип, оларга чоохтаан: «Нимее Мини хыңаландырчазар? Магаа динарий ахчаны ағыл киліңер. Мин көріп алим аны». 16 Олар ахча ағыл килгеннер. Иисус оларга теен: «Кемнің мында сомы паза ады хоостал парған?» Олар нандырғаннар «Хан кізіни». 17 Андада Иисус оларга чоохтаан: «Ханның нимезін ханга пиріңер, Худайнин - Худайға». Агаа прайзы хахаан. 18 Анаң Иисуссар саддукейлер пас килгеннер. Олар өлім соонда кізі тірілбинче тічеңнер. Амды Иисустаң олар сурғаннар: 19 «Ўгретчі! Моисей піске піди пасхан: „Пирее кізінің харындазы үреп парып, поэнының пала чох ипчизин артыс салза, аны туңмазы алып, харындазының төөлін узарадарга кирек." 20 Читі харындас полған полтыр. Иң улуғлары, ипчі алған соонда, үреп партыр. Палазы чох полған. 21 Аның ипчизин ікинчі харындазы алған. Ідөк, пала төрітпин, үреп парған. Үзінчизі ол ипчині алып, үребөк парған. 22 Иди аны читі харындас, соон сүрістіре алып, чуртаптыр, че прайлары пала артыспин, үрееннер. Прайзының соонаң ол ипчі үребөк парған. 23 Ам олар прайзы тіріл килзелер, ол ипчі хайзыни поларга кирек? Прай читі харындас ол ипчинің ирі полған нооза». 24 Иисус оларга нандырған: «Сіерер, Ызых Пічіктерні дее, Худай күзін дее пілбин, іди алчаасха кірчезер, неке? 25 Кізілер өлген соонда тірілзелер, олар паза ипчі албинчалар, ирге дее парбинчалар. Олар тигірдегі ангеллер осхас поларлар. 26 Өліглер тірілерінеңер сіерер Моисейнің пічиинде хығырбаазар ба, хаңан Худай көйчеткен ыдырбан хыринда теен: „Мин Авраамның Худайы, Исаактың Худайы паза Иаковтың Худайы полчам?" 27 Ол өліглернің Худайы полбинча, че Ол тіріглернің Худайы полча. Сіерер угаа алңаастапчазар».

### Иң улуғ чахығ

28 Үлгү үгретчілерінің пірсі, оларның таласханнарын паза Иисустың маңат нандырчатханың истіп, Иисустаң сурған: «Чажығларның хайзы иң улуғдыр?» 29 Иисус агаа нандырған: «Иң улуғ чахығ мындағ: „Ис, Израиль! Пістің Худайыбыс чалғыс ла Худай полча. 30

Син Худайға прай чүрееннең, прай тыныңнаң, прай сағызыңнаң паза прай күзіңнең хынарға кирексің." Мына иң улуғ чахығ! 31 Ікінчізі ағааох төөй: „Пасха кізее поэңа чіли хын". Пу ікі чахығдаң улуғ нима чоғыл». 32 Үлгү үгретчізі Иисусха теен: «Чахсы нандырдың, Үгретчі! Орта тіпчезің Син, Худай пір ле полча, Аның пасха пір дее Худай чоғыл. 33 Ағаа прай чүрекнең, прай сағызыңнаң, прай тыныңнаң, прай күзіңнең хынары паза пасха кізее посха чіли паарсиры прай ағылған паза тайыға салған нимелердең артых полча». 34 Иисус көрче, ол үлгү үгретчізі хыйға чоохтапча. Аннаңар, ағаа теен: «Син Худай Хан Чирінең ырах нимес полтырзың». Аның соонаң Иисусха сурығлар пирерге пірдеезі тідінмеен.

### Үлгү үгретчілерінең китеніңер

35 Анаң Иисус, кізілерні худай өргезінде үгретіп, чоох-таан оларға: «Хайди тіпчелер үлгү үгретчілері, Христос Давидтің төлі полча тіп? 36 Давид поэы, Худай Худына көңнін көдіріп, чоохтанған: «Худай чоохтаан минің Хан Худайыма: „Минің оң саримда одыр сал, Мин Синің ыырңыларыңны азахтарыңның алныңа салғанңа"». 37 Иди Давид поэы Аны Хан Худайым тіп адапча. Хайди Иисус аның төлі пол парар?» Көп чон Аны өрчіліг искен. 38 Ол поэының үгретіинде ідөк чоохтаан: «Үлгү үгретчілерінең китеніңер. Олар узун киптер кизерге паза кізілер чыылысхан чирлерде алғыстар аларға хынчалар. 39 Синагогаларда паза тойларда пастағы орыннарда одырчалар. 40 Олар өкіс ипчілерні үретчелер, кізі көзіне үр пазырчалар. Олар Худайның чарғызына кірерлер».

### Өкіс ипчінің хозымы

41 Анаң Иисус, сыйыхтар салчатхан ідістің хыринда одырып, кізілер ол ідіссер хайди ахча салчатханнарын көрчеткен. Пай кізілер көп ахча тастапчатханнар. 42 Че пір чох чуртапчатхан өкіс ипчі, киліп, ікі оох ахча салыбысхан. 43 Иисус, Поэының үгретчілерін хығырып, оларға чоохтаан: «Сынны чоохтапчам сірерге, пу өкіс ипчі ідіссер

прайзының көп ахча салыбысхан. 44 Көбізі постарының артых ахчаларын салғаннар, че ол өкіс ипчі, тізең, چیңең ниме алңаң парчох ахказын салыбысхан.

## Иерусалимнің иңзерілерденер ухаанчылааны

13:1 Иисус худай өргезінең сыхчатханда, Аның үгретілерінің пірсі Ағаа теен: «Үгретчі! Көр хайдағ илбек тура, хайдағ маңат тастардаң иділген ол!» 2 Иисус ағаа нандырған: «Син илбек тураны көрчезің? Мында, прай ниме иңзеріліп, тас үстүнде тас халбас». 3 Анаң Иисус худай өргезінең тоғыр Елеон тағда одырчатханда, Пётр, Иаков, Иоанн паза Андрей Иисустаң ағылахха сурғаннар: 4 «Ол ниме хачан пол парар паза пу ниме полар алныңда піске хайдағ танығ көрінер?» 5 Иисус оларға піди нандырған: «Китеніңер, пірдеезі сірерні алчаахтыр салбазын. 6 Көп кізі минің адымнаң кил турар, „Мин - Христос-пын!“ тир, анаң көбізін алаахтырар. 7 Хачан сірер чааданар алай чаа полардаңар чоохтарны ис салзар, хорыхпаңар. Ол полңаң ниме. Анзы түгенңізі полғалах полар. 8 Чоннар чоннардаң тоғыр көдірілібізерлер, ханнар ханнардаң тоғыр чаалазарлар. Хай-пірее чирлерде чир тітірир паза хоорылыс, өзөгіс пол сығар. Анзы ағырығларның пасталғаны полар.

## Ирее паза чобағ полар

9 Че сірер китеніңер. Сірерні чарғаа тартарлар паза синагогаларда соғарлар. Минің үчүн сірерні, Миннеңер киречілирге тіп, ханнарның паза пиглернің алныңда турғызарлар. 10 Че иң пурун прай чоннарны Чахсы хабарға үгредерге кирек. 11 Хаңан сірерні, тудып алып, чарғаа апарчатсалар, нимеденер чоохтирынаңар азындыра сағыссырабаңар. Ол туста сірерге хайдағ сағыс пирилзе, аны чоохтап турыңар. Аны сірер нимес, че Худай Худы чоохтанар. 12 Харындазы харындазын паза пабазы олғаннарын өдірер. Паза олғаннары паба-іңезінең тоғыр көдірілерлер, оларны өлімге пирерлер. 13 Минің үчүн сірерні прайзы хырт көрер. Че кем,

халғанңызына теере прай сыдазар, ол арачылан халар. 14 Хаңан ухаанңы Даниил чоохтаан хоостыра полбас чирде кизи көрнее чох ай-пораан полчатса - хығырығңы пілерге кирек, ниме полчатханың - андада иудеядағылар тағларзар тизерге киректер. 15 Кем тура хырында полар, ол ибінзер ниме-ноо аларға кірбезін. 16 Кем чазыда полар, кип-азаан аларға нандыра килбезін. 17 Ол күннерде хыйал полар тойлығ паза час пала азырапчатхан ипчілерге. 18 Пу ниме хысхызын пол парбазын тіп, пазырыңар. 19 Ол күннерде, Худай чир-чайаан пүдіргеннең пеер амға теере полбаан улуғ чобалыс полар. Соонаң даа андағ хорғыстығ полбас. 20 Худай ол хорғыстығ күннерні хызырбаан полза, пірдеези арачылан полбасчых. Че Позының таллап алған кизілерінің үчүн ол күннерні хызырған. 21 Андада сірерге піреези: „Мына Христос мында" алай „Ол анда" тізе, киртінмеңер. 22 Андада чой христос паза чой ухаанчылар сых килерлер. Турыстығ кизілерні алаахтырарға тіп танығлар паза хайхастар көзідерлер. 23 Сірер, тізең, китеніңер. Мин сірерге азынадох прай чоохтап пирдім. 24 Ол саай пол парған күннерде күн пүлестел парар паза ай чариин пирбес. 25 Чылтыстар тигірдең тоолап парарлар. Тигірде прай ниме алыс чөрібізер. 26 Олар андада Кизи Оолғын пулуттарда илбек күстіг паза саблыт пас парчатханың көр саларлар. 27 Андада Ол Позының ангеллерін ызыбызар. Олар прай чир үстүндегі Позының турыстығларын чығарлар.

### Хачан полар ол күн?

28 Көзидімге, смоковница ағазын алыңар: аның салаалары, нымзах улыбызып, пүрленіп пастабыссалар, чайғы чидіп одырғаның пілерзер. 29 Ідөк сірер, анзын көріп, ол мында чағын, ізік хырында читкенін піліңер. 30 Сынны чоохтапчам сірерге, амғы төл парғалахох, пу прай ниме пол парар. 31 Чир паза тигір чіт парар, че Минің сөстерім халар. 32 Ол күн алай тус хаңан поларынаңар Кизи Оолғы даа, тигірдегі ангеллер дее - пірдеези пілбинче. Адабыс ла пілче. 33 Ол тус хаңан пол парарын пілбинчеткенде, көріңер,

узубаңар, пазырыңар. 34 Хайди пірее кізі, ырах чорыхха парчатса, позының нымысчыларының полғаныңа ла ниме идерге паза хадағнаа сиргек поларға чахып салча. 35 Аннаңар сиргек польңар. Сірер пілбинчезер нооза, хаңан чиде түзер тура ээзі: иирде, алай хараа, алай иртен, петух тапсирда ба, алай күнөрте бе. 36 Кинетін чиде түзіп, сірерні узупчатханнарыңны тудып албазын. 37 Сірерге чоохтапчатхан нимені прайзына чоохтапчам: узубаңар.»

## Иисустан тоғыр чөптезіг

14:1 Пасха паза Ачытпаан халастар үлүкүннеріне ікі күн халған. Улуғ абыстар паза үлгү үгретчілері Иисусты, пірее көйтікнең тудып алып, өдір саларға сағыныбысханнар. 2 «Че чонны тарындырбас үчүн, үлүкүн тузында ла нимес», - тіп олар чоохтасханнар.

## Иисусты сүртклеені

3 Иисус Вифанияда ходырлығ Симонның туразында стол кистінде одырчатханда, андар алавастр ідістіг ипчі кір килген. Ідісте нард өзімінең сығарған аарлығ хайах полған. Ипчі, ол ідісті одып, Иисустың пазына ол хайахты урған. 4 Пірееелері, ачырған парып, удур-төдір чоохтасханнар: «Нимее ол аарлығ хайахты піди үретче? 5 Ол хайахты үс чүс динарийдең артығох садыбызып, ахказы чох кізілерге үлеп пирерчік», - тіп перініскеннер. 6 Че Иисус теен: «Чоохтанмаңар ағаа. Ноға хырысчазар аны? Ол Мағаа чахсы ниме ит пирген. 7 Чох кізілер сірернің хыриңарда хаңан даа поларлар. Сірер оларға хаңан даа полыс поларзар. Че Мин сірернең хада төөле полбинчам. 8 Пу ипчі итчең киреен ит салған. Мині чыырға тимнеп, азынада Мағаа аарлығ хайах сүрткен. 9 Сынны чоохтапчам сірерге, Чахсы хабарны хайдағ даа чирде үгрэнзелер, анда пу ипчіденер паза ниме иткенінеңер прай чоохталар».

## Иуда улуғ абыстарда

10 Аның соонаң Иуда Искариот, он ікі үгрөнңінің пірсі, Иисусты садыбызарға улуғ абыстарзар парған. 11 Аны истіп салып, улуғ абыстар өрін парғаннар паза ағаа ахча пирер полғаннар. Анаң Иуда Иисусты оларның холына пирібізерге оңдай тілеп сыххан.

## Пасха чиизи

12 Ачитпаан халастар үлүкүннің пастағы күнінде, тайыға хураған соғыбысханнарында, үгрөнңілері Иисустаң сурғаннар: «Син иирде хайда азыранарзың? Піс, андар парып, чічең ниме тимнебізербіс». 13 Иисус, Позының ікі үгрөнңінін ысчадып, оларға чоохтаан: «Парыңар городсар. Ырағада суғ апарчатхан кізее тоғазарзар. Аның соонңа парыңар. 14 Анаң ол кірген тураа соонңа кіріп, тура ээзіне чоохтаңар: „Үгретчі Позының үгрөнңілерінең хада үлүкүн астамағын чирге орын сурча". 15 Ол сірерге төрдегі улуғ пөлікті көзіт пирер. Анда прай ниме тимде полар. Андох піске чічең ниме тимнеп саларзар». 16 Үгрөнңілері, городсар парып, Иисус чоохтаан чіли, ол тураны таап алғаннар. Анда үлүкүн ас-тамағын тимнебіскеннер. 17 Иир пол килгенде, Ол он ікі үгрөнңізінең хада килген. 18 Олар стол кистінде одырып, азыранчатханда, Иисус чоохтанған: «Сынны чоохтапчам сірерге, Миннең хада азыранчатханнарның пірсіңер, Мині ыырңылар холына пирібізер». 19 Үгрөнңілері хомзын парғаннар, пірсі пірсінең соонңа Иисусха тееннер: «Мин ол нимеспін?» 20 Ол үгрөнңілеріне нандырған: «Ол он ікі кізінің пірсі, хайзы Миннең хада айахта халазын сүртклепче. 21 Кізі Оолғы, итседе, Ағаа пирілген үлүс хоостыра парар. Че Кізі Оолғын садыбысхан кізее хыйал полар. Ол кізі төрібеен полза, артых поларных». 22 Олар азыранчатханда, Иисус, халас алып, алғабысхан. Анаң, сындырып, үгрөнңілеріне пирген: «Алыңар, чіңер. Пу Минің Идім». 23 Анаң чірче алып, алғабысхан соонда, аны үгрөнңілеріне пирген. Прайзы аны іскеннер. 24 Иисус оларға теен: «Пу Минің Наа Молнағ Ханым, көп кізілернің үчүн ол төгілер. 25 Сынны чоохтапчам сірерге, ам Мин пу виноград арағазын паза

мында іспеспін. Наа арағаны Мин Худай Хан Чирінде ле ізербін».

## Пётрның хыйа поларынаңар чоохтааны

26 Анаң Худайны сабландырчатхан сарыннар сарназып ала, олар Елеон тағзар парғаннар. 27 Иисус оларға теен: «Пу хараазын сірер прайзыңар Мині тастирзар. Хайди пазылча: „Хадағңыны чох ит салза, хойлары пытырас парар". 28 Че Мин, тірілген соонда, сірерні Галилеяда сағирбын». 29 Пётр Иисусха чоохтаан: «Сині прайлары даа тастаза, мин тастабаспын». 30 Андада Иисус ағаа теен: «Сынны чоохтапчам сағаа, син пуох хараазын, петух ікі хати тапсаанңа, Миннең үс хати хыйа поларзың». 31 Че Пётр хатап-хатап чоохтаан: «Мағаа Синнең хада өлерге киліссе дее, мин Синнең хыйа полбаспын». Пасха үгренңілері ідөк чоохтанғаннар.

## Иисус Гефсиманияда

32 Анаң олар Гефсимания теен аалзар читкеннер. Иисус Позының үгренңілеріне теен: «Мин пазырып алғанңа, мында одыр турыңар». 33 Позынаң хада ол Пётрны, Иаковты паза Иоанны алып алған. Анаң Позы хомзынып паза мөңіссіреп пастаан. 34 Үгренңілеріне теен: «Минің тыным чоо хомзынча. Пол турыңар мында, узубаңар». 35 Үрах таа парбин, Иисус, чирге түзіп, оңдай полчатса, ол килчеткен үлүс Ағаа түспезін тіп, пазыр сыххан. 36 Піди чоохтанған: «Адам Минің! Син прай ниме ит полчазың. Пу килчеткен үлүсті Миннең хыйа идібіс. Че Син, Мин сағынғанни итпин, Позың көңнін толдыр тур». 37 Айлан киліп, көрзе, үгренңілері узупчалар. Андада Пётрға чоохтаан: «Симон, син узупчазың ма? Пір час таа узубин одыр полбадың ма? 38 Хыңаланысха кірбес үчүн, узубаңар, пазырыңар. Кізі тыны күстіг, че ит-сөөгi уян». 39 Пазох хыйа парып, пайаағох сөстерні чоохтанып, пазыр сыххан. 40 Анаң нандыра киліп, Иисус оларның хатабох узуп-чатханнарын көр салған. Харахтарын даа ас полбин-чатханнар. Олар Ағаа ниме нандыраын даа пілбееннер. 41 Анаң Ол, үзінңізін

киліп, пазох оларға чоохтаан: «Сіерер ам даа, тынанып, узупчазар ба? Чидер. Тус чит килді. Кізі Оолғы чазыхтығларның холына пирилче. 42 Турыңар, парааңар. Мині садыбысхан кізі киліп одыр».

### Иуданың садышаны

43 Олох туста, Иисус чоохтанчатхандох, он ікі үгретчидің пірсі, Иуда көрине түскен. Аныңаң хада холларында хылыстығ паза өзектіг көп кізілер полғаннар. Оларны пеер улуғ абыстар, үлгү үгретчидің пірсі паза ах сағаллар ысханнар. 44 Иуда ол кізілерге теен: «Мин, парып, Кемні охсаныбызам, ол Иисус полар. Парып, Аны хабаңар, сибер апарыңар». 45 Анаң ол, сах андох Иисуссар пас киліп, теен: «Үгретчи! Үгретчи!» Анаң Аны охсаныбысхан. 46 Тирігліг кізілер Иисусты, хаап алып, апар сыхханнар. 47 Хости турчатханнарның пірсі, хылыс сығар киліп, улуғ абыстың чалчызының хулаан үзе саабысхан. 48 Андада Иисус оларға чоохтаан: «Сіерер Миннең тоғыр, улуғ сайбағңыны ла тударға килген чили, хылыстығ паза өзектіг читтіңер. 49 Мин сіерернең хада күннің сай худай өргезінде пол турғам. Мин сіерерні үгреткем паза сіерер Мағаа теңмеезер. Че Пічікте пазылған ниме - ол толзын». 50 Иисустың үгретчидің пірсі, Аны тастап, чүгүрібіскеннер. 51 Пір оол, чалаас идіне чабынғаа ораанып, Иисустың соонға парған. Чааңылар аны тудыбох алғаннар. 52 Че ол, чабынчағын оларның холында артыс салып, чалаас чүгүре халған.

### Иисус өөркі чарғы алнында

53 Иисусты улуғ абыссар ағыл килгеннер. Прай улуғ абыстар, ах сағаллар паза үлгү үгретчидің пірсі пеер чылысханнар. 54 Пётр, оларның соонға оортахтаң сүріс киліп, улуғ абыстың туразының сиден істіне кіріп алған. Анда чалңыларнаң хада от хыринда чылынған. 55 Улуғ абыстар паза өөркі чарғы, Иисустаң тоғыр пірее пыро таап алып, Аны өлімге чарғылирға харасханнар. Че пір дее сылтағ таап полбин турғаннар. 56 Көп кізі Аның тоғыр чой



ондайнаң киречілеен, че оларның чоохтанғаннары нимее чарабаан. 57 Хай-піреелері, турып, Аның тоғыр өнетін сын нимес нимелер чоохтааннар: 58 «Піс Аның піди теенін искебіс: „Мин пу кізі холларынаң иткен худай өргезін иңзерібізербін, анаң үс күн аразына кізі холы теңмеен пасханы идібізербін"». 59 Че пу даа тайма чоох читкіні полбаан. 60 Андада улуғ абыс, аның алныңда турыбызып, сурған: «Ноға Син пір дее ниме нандырбинчазың? Хайдағ чоохтар олар Синің тоғыр сығарчалар?» 61 Че Иисус сым на полған, пір дее ниме нандырбаан. Улуғ абыс пазох сурған: «Синзің ме Христос, Худай Оолғы?» 62 Иисус нандырған: «Я, сірер Худайның оң саринда одырчатхан паза тигірдегі пулуттарда килчеткен Кізі Оолғын көрерзер». 63 Андада улуғ абыс, кип-азаан тали тартып, хысхырған: «Піске паза хайдағ киречілер кирек? 64 Сірер истер, хайди Ол Худайны нимее салбинча. Сірер хайди сағынчазар?» Олар прайзы Аны, пыролыға санап, өлімге чарғылабысханнар. 65 Піреелері Ағаа чаба түкүр сыхханнар, хараан сүбүрекнең палғабызып, Аны сапхлааннар, анаң чоохтанғаннар: «Че амды ухаанңылап көр, кем сапты?» Нымысчылары даа Иисусты наахтарынаң сапханнар.

### Пётрның хыйа полганы

66 Пётр сиден істінде полчатханда, андар улуғ абыстың чалңы полчатхан ипчі пас килген. 67 Пётрны от хыринда чылын турчатханың көріп, ол ипчі чоохтанған: «Син дее Назареттең сыххан Иисуснаң хада полғазың». 68 Че Пётр, тоғыр саап, чоохтанған: «Піл полбинчам нимедеңер син чоохтапчазың?» Позы ограда ізігі хыринзар паза халған. Ол туста петух тапсабысхан. 69 Ол чалңы ипчі, соонаң Пётрны көріп, хости турчатхан кізілерге пазох чоохтаан: «Пу кізі оларның пірсі полча». 70 Пётр пазох тоғыр сапхан, че түрчедең анда турчатхан кізілер Пётрға чоохтан сыхханнар: «Син сынап таа оларның кізізі поларзың. Чооғың даа хоостыра син Галилеядаңзың». 71 Пётр, пазырып, сөс пирген: «Мин пілбинчем Ол кізіні, кемненер сірер чоохтапчазар». 72 Ол туста

петух ікінңизін тапсабысхан. Андада Пётрның сағызына Иисустың чооғы кір килген «Петух ікі хати тапсаанңа, син Миннең үс хати хыйа поларзын». Пётр ылғабысхан.

## Иисус Пилаттың алныңда

15:1 Иртен пол килгендөк, улуғ абыстар, ах сағаллар паза үлгү үгретчилері паза прай өөркі чарғы, чөптескен соонда, Иисусты палғап алып, Пилатсар апарғаннар. 2 Пилат Иисустаң сурған: «Син Иудей ханы полчазың ма?» Иисус ағаа нандырған: «Син іди чоохтапчазың». 3 Улуғ абыстар Иисусты көп нимеде пыролааннар. 4 Пилат пазох Иисустаң сурған: «Син пір дее ниме чоохтабинчазың? Көрчезің, хайдағ көп пыро Сағаа артчалар?» 5 Иисус андада даа пір дее ниме нандырбинчатханнаңар, Пилат таңнаан. 6 Полған на үлүкүнде Пилат, чон сурынған хоостыра, харибдең пір кізі поэдыбыс турған. 7 Ол туста харибде, сайбағңыларнаң хада Варавва теен кізі полған. Олар хоорылыстар тузында кізі өдір салтырлар. 8 Амды чыылған чон Пилатты ол кибірні иртірерге сурынған. 9 Пилат олардаң сурған: «Поэдим ма сірерге Иудей ханың?» 10 Ол улуғ абыстар Иисусты, істі чоxtанып, аның холына пирібіскеннерін пілген. 11 Че улуғ абыстар, Иисустың орныңа Варавваны поэдыбызарға сурынзыннар тіп, кізілерні көөктіргеннер. 12 Пилат пазох кізілерге айланған: «Хайди идим сірер Иудей ханы тіпчеткен кізіні?» 13 Кізілер пазох хысхырыс сыхханнар: «Хазирға Аны!» 14 Пилат оларға теен: «Хайдағ хомай ниме ит салған Ол сірерге?» Че кізілер улам тың хысхырғаннар: «Хазирға Аны!» 15 Андада Пилат, чон көңнінче польп, Варавваны поэдыбысхан, че Иисусты, соғып, анаң кіреске хазап саларға чахаан. 16 Чааңылар, тізең, Иисусты ах өрге туразар, преторияның істінзер апарыбысханнар паза Аны хадарарға прай полкты чыып алғаннар. 17 Анаң Ағаа узун хызыл көгенек кизіртбіскеннер, анаң харағаннаң веннок палғап алып, Аның пазына салыбысханнар. 18 Ағаа хысхырғаннар: «Изен ползын, Иудей ханы!» 19 Чааңылар Аны

пазынаң тайахнаң сапхлааннар, чаба түкүргеннер паза, тізекке түзіп, Ағаа, күрленіп, пазырғаннар. 20 Читіре иреелеп алып, олар Иисустың хызыл көгенеен суурыбысханнар, анаң, Позының кип-азахтарын кизіртібізіп, Аны кіреске хазирға апарғаннар.

## Голгофада

21 Чазыдаң парчатхан Киринаедағы Симонны, Александрнаң паза Руфьтың пабазын, Иисустың кірезін апардырғаннар. 22 Иисусты Голгофа теен чалаас тигейзер ағыл килгеннер. 23 Иисусха смирна хайахтығ араға ізерге пиргеннер, че Ол іспеен. 24 Анаң, Иисусты кіреске хазап салып, чааңылар, үлег үлүзі тастап, Аның кип-азаан үлескеннер. 25 Аны кіреске хазаан туста күн сыхханнаң үс час тузы полған. 26 Иисусты пыролап, «Иудей ханы» тіп пазыл парған чардычахты кіреске хазааннар. 27 Иисуснаң хада ікі сайбағңыны хазап салғаннар. Пірсін Аның оң саринда, ікінцізін, тізең, сол саринда. 28 Ызых Пічікте азылған ниме толған: «Сайбағңыларға тиңнелген». 29 Хыринңа парчатхан кізілер Иисусты сөклеп турғаннар, пастарын чайхап, хысхырғаннар: «Эй, Син, худаи өргезін, иңзеріп, үс күнге пүдірчең Кізі! 30 Арачыла Позыңны, түзіп ал кірестең!» 31 Улуг абыстар паза үлгү үгретчілері ідөк хатхырысханнар, удур-төдір чоохтасханнар: «Пасхаларын арачылап турған, че Позын, тізең, арачылап полбинча! 32 Израиль ханы, Христос кірестең поэп алзын. Андада, Аны көріп, піс киртінербіс». Иисуснаң хада хазаттырған сайбағчылар ідөк Аны сөклееннер. 33 Алты час тузында прай чир үстүнде харасхы улыбысхан. Іди тоғыс часха теере полған. 34 Тоғыс час тузында Иисус өтіг табыснаң хысхыра түскен: «Элои, Элои! Ламма савахфани?» Мынзы «Худайым, Худайым! Ноға Син Мині тастадың?» теені полча. 35 Мында хости турчатхан кізілер, ол сөстерні истіп, чоохтасханнар: «Мына, Илияны хығырча». 36 Пір кізі, чүгүр парып, сүбүрекке укус арағазын сигдіріп алып, аны узун сырғайға хаптырып, Иисусха ізерге сунған: «Көрербіс, килер бе Илия Аны кірестең сууарға?» 37

Иисус, тізең, хысхыра түзіп, тының позыдыбысхан. 38 Олох туста худай өргезінде көзеңе үстүнең алтына читіре ікі чара талал парған. 39 Иисустаң тоғыр турған сотник Аның іди, хысхырып, тоозыл парғаның көріп, чоохтанған: «Пу Кізі сынап таа Худай Оолғы полтыр». 40 Мында оортахтын көр турған ипчілер дее полғаннар. Оларның аразында Мария Магдалина, Иосий паза кічіг Иаков харындастарның інезі Мария паза Саломия полғаннар. 41 Олар Иисустың соонңа Галилеядаңох сығара килгеннер паза Ағаа полыс турнаңнар. Олардаң даа пасха Иерусалимзер килген көп кізілер полғаннар.

### Иисусты чығаны

42 Суббота күн алныңдағы пятница күн иир пол килген. 43 Аримафеядаң пастыхтарның саблығ кізізі Иосиф читкен. Ол позы даа Худай Хан Чирі килерін сағаан. Ол туртухпин, Пилатсар кіріп, Иисустың сөөгін сурған. 44 Пилат Иисустың іди табырах үреп парғаныңа таңнап таа парған. Сотникті хығыр киліп, сурған: «Хаңан үреен Ол?» 45 Сотниктің чооғын истіп алып, ол Иисустың сөөгін Иосифке пирибіскен. 46 Иосиф, лөн исті садып алып, Иисусты кірестең суурып, иске ораабысхан. Анаң хайада кирт салған хую істінде Аны сал салған. Хуюның ахсын улуғ таснаң пазыр салған. 47 Мария Магдалина паза Иосийнің інезі Мария Иисусты хайда чығаннарын көргеннер.

### Ипчілер хуруғ хую хыринда

16:1 Суббота күн ирт парғанда, Мария Магдалина, Иаковтың інезі Мария паза Саломия, Иисустың сөөгін сүртерге тіп, тадылығ чыстығ хайах садып алғаннар. 2 Неделяның пастағы күнінде, позырахта, иртен иртөк, күн наа ла сыхчатханда, олар Иисустың хомдызынзар килгеннер. 3 Анаң удур-төдір чоохтасханнар: «Кем піске хую ахсын пазырған тасты оортах ит пирер?» 4 Көрибісселер, ол тасты кем-де хыйа ит салтыр. Ол, тізең, уғаа килкім полған. 5

Хую істінзер кір килгенде, анда оң саринда одырчатхан аппағас кип-азахтығ чиит оолны көр салып, уғаа тың чочып парғаннар. 6 Оол, тізең, оларға теен: «Хорыхпаңар миннең. Сірер кіреске хазаттырған Назареттең сыххан Иисусты тілепчезер. Ол тіріл килген, мында чоғыл. Мына чатхан орны. 7 Амды, парып, Аның үгрөнңілеріне паза Пётрға чоохтаңар. Иисус сірерні Галилеяда сағир. Анда сірер Аны, хайди Ол сірерге чоохтаан, көрерзер». 8 Ол ипчілер, хуюдаң сых киліп, андартын хыйа чүгүргеннер. Олар, уғаа тың хорых парып, пірдеезіне пір дее ниме чоохтабааннар.

### Иисус үгрөнчілеріне көрінче

9 Неделяның пастағы күнінде иртен иртөк тіріл килген Иисус пастап Мария Магдалинаа көрінген. Ол ипчіден Иисус хаңан-да читі чабал хутты сығара сүрген. 10 Мария, парып, чобалып ылғасхлап одырчатхан үгрөнңілеріне прай чоохтап пирген. 11 Че олар Иисустың тіріл парғаның паза Марияның Аны көргеніне киртінмееннер. 12 Аның соонаң Иисус, хубулып алып, аалзар парчатхан ікі үгрөнчзіне чолда тоғасхан. 13 Олар, айлан киліп, пасхаларына чоохтап пиргеннер. Че пу ікөлеңе дее киртінмееннер. 14 Соонаң Иисус иирде азыранып одырчатхан он пір үгрөнчзіне көріне түскен. Ол үгрөнңілерін Позы тіріл килгенінеңер чоохха киртінмеен паза хатығ чүректіглері үчүн көксеен. 15 Анаң оларға чоохтаан: «Прай чир үстүнңе чөріп, Чахсы хабарға полған на тіріг нимені үгрөдінер. 16 Кем, киртініп, кірөске түзер, арачылан халар, кем киртінмес, ол чарғыладар. 17 Киртінчеткеннерге, мындағ таңма түзер: олар Минің адымнаң чабал хуттарны сүрерлер паза наа тілленең чоохтазарлар. 18 Олар, чыланнарны холнаң тударлар, оохтырчатхан нимелерні ізібісселер, хайтпастар паза ағырығ кізілерге холларын салзалар, аннары хазых пол пар турарлар». 19 Пу чоохтың соонда, Ол, тигірзер өөрлебізіп, Худайның оң саринда одыр салған. 20 Үгрөнңілері, тізең, прай чир үстүнңе чөріп, Худай улызыинаң хайхастығ нимелер идіп, кізілерні киртіністіг иде

үгреткенер. Аминь.